

摘藻堂四庫全書薈要

經部

欽定四庫全書薈要

經部

春秋張氏集註

綱領
卷二



欽定四庫全書薈要

春秋張氏集註目錄

卷一

隱公

卷二

桓公

卷三

莊公



閔公

卷四

僖公

卷五

文公

卷六

宣公

卷七

成公

卷八

襄公

卷九

昭公

卷十

定公

卷十一

哀公

臣等謹案春秋集注十一卷宋直秘閣張洽撰洽字元德清江人嘉定初進士終著作佐郎端平元年朝廷知洽家居著書宣命臨江軍守臣以禮延訪齋紙扎謄寫以進書既上除洽知寶章閣會洽卒諡之曰文憲以其書付秘閣洽自言於漢唐以來諸儒之議論莫不考覈研究取其足以發明聖人之意者附

于每事之左名曰春秋集傳既又因此書之
粗備復倣文公語孟之書會其精意詮次其
說以為集注蓋其學有淵源故詞義頗為純
粹前列綱領一卷體例亦極詳明春秋家之
卓然可觀者也明洪武中以此書與胡氏傳
同頒之學官迨永樂間襲環谷汪氏纂疏為
大全其說專主胡傳洽之說遂廢不行其存
于今者幸也洽又有春秋歷代郡縣地里沿

革表今不傳矣乾隆三十九年十月恭校上

總纂官

臣紀昀

臣陸錫熊

臣孫士毅

孫士毅

總校官

臣陸

費

墀

墀

墀

欽定四庫全書叢要

春秋張氏集註序

嘗聞之程子云看春秋有法以傳考經以經考傳今觀
主一張君集註纂傳文載於經下而繫以諸家之說使
學者開卷筆削之法瞭然在目固已得伊川先生之遺
意而又間附以己見索幽闡秘研精極微有前人論著
之所未到猶之聚寶為器益以零金碎玉而加追琢之
工後有作者弗可及已其間如論楚之救鄭既不書救

又貶稱人以見荆蠻之不足進至吳之救陳既不書師復不書人以見世變之益可哀他如於公如京師而繼之以伐秦而謂臣禮之僅存者不可廢臣禮之不專者為可貶而兩寓其旨於葬蔡景公而繼之以宋災故而謂用變例以迭書慮中國之淪胥日敗而三致其意若此之類發明為多皆能沉潛書法之妙體認史外傳心之蘊不為無補於聖經苟惟無得於此則若荆公惟見其為斷爛朝報耳二百四十餘年褒貶之筆夫子之志

不幾泯夫此書惟臨江有刊本遭燬之後董克翁以錄
本示予謂不可不壽其傳故鋟梓於華亭之義塾云德
祐乙亥菊節衛宗武謹書

欽定四庫全書薈要卷一千四百七十

經部

春秋綱領

論語堯曰咨爾舜天之歷數在爾躬允執其中四海困

窮天祿永終舜亦以命禹曰

程子云曰上少湯字

予小子履敢

用玄牡敢昭告于皇皇后帝有罪不敢赦帝臣不蔽

簡在帝心朕躬有罪無以萬方萬方有罪罪在朕躬

周有大賚善人是富雖有周親不如仁人百姓有過
在予一人謹權量審法度修廢官四方之政行焉興

滅國繼絕世舉逸民天下之民歸心焉所重民食喪

祭寬則得衆信則民任焉敏則有功公則說。顏淵

問為邦子曰行夏之時

寅為人正時以作事當以人為紀故取之

乘殷之

輅

得質之中

服周之冕

得文之中

樂則韶舞放鄭聲遠佞人鄭

聲淫佞人殆。子張問十世可知也子曰殷因於夏

禮所損益可知也周因於殷禮所損益可知也其或

繼周者雖百世可知也

所因謂三綱五常所損益謂文質三統也

子曰

道千乘之國敬事而信節用而愛人使民以時。子

曰晉文公譎而不正齊桓公正而不譎。子曰齊一變至於魯魯一變至於道。孔子曰天下有道則禮樂征伐自天子出天下無道則禮樂征伐自諸侯出自諸侯出蓋十世希不失矣自大夫出五世希不失矣陪臣執國命三世希不失矣天下有道則政不在大夫天下有道則庶人不議孔子曰祿之去公室五世矣政逮於大夫四世矣故夫三桓之子孫微矣。子曰夷狄之有君不如諸夏之亡也。陳成子弑簡

公孔子沐浴而朝告於哀公曰陳恒弑其君請討之
公曰告夫三子孔子曰以吾從大夫之後不敢不告
也君曰告夫三子者之三子告不可孔子曰以吾從
大夫之後不敢不告也

孟子曰世衰道微邪說暴行有作臣弑其君者有之子
弑其父者有之孔子懼作春秋春秋天子之事也是
故孔子曰知我者其惟春秋乎罪我者其惟春秋乎
公羊傳子曰春秋之信史也其事則齊桓晉文其會
則主會者為之也其詞則丘有罪焉爾亦此意也

昔者禹抑洪水而天下平周公兼夷狄驅猛獸而百姓寧孔子成春秋而亂臣賊子懼。王者之迹熄而詩亡詩亡然後春秋作晉之乘楚之檮杌魯之春秋一也其事則齊桓晉文其文則史孔子曰其義則丘竊取之矣。春秋無義戰彼善於此則有之矣征者上伐下也敵國不相征也

史記魯哀公十四年春狩于大野獲麟孔子曰吾道不行矣乃因史記作春秋上至隱公下訖哀十四年約

其文詞而指博故吳楚之君自稱王而春秋貶之曰
子踐土之會實召周天子而春秋諱之曰天王狩于
河陽推此類以繩當世孔子在位聽訟文詞有可與
人共者弗獨有也至於為春秋筆則筆削則削子夏
之徒不能贊一詞

莊周氏曰春秋經世先王之志也聖人議而不辯又曰
春秋以道名分

公羊氏曰春秋何以始乎隱祖之所逮聞也何以終乎

哀十四年曰備矣君子曷為為春秋撥亂世反之正
莫近諸春秋

漢董氏曰孔子知時之不用道之不行是非二百四十
二年之中以為天下儀表貶諸侯討大夫以達王事
曰我欲載之空言不如見之行事之深切著明也有
國者不可不知春秋前有讒而不見後有賊而不知
為人臣者不可不知春秋守經事而不知其宜遭變
事而不知其權為人君父而不通於春秋之義者必

蒙首惡之名為人臣子而不通於春秋之義者必陷篡弑誅死之罪其實皆以善為之而不知其義被之空言不敢辭故春秋者禮義之大宗也

隋王通氏曰春秋之於王道是輕重之權衡曲直之繩墨也

濂溪周子曰春秋正王道明大法也孔子為後世王者而修也亂臣賊子誅死者於前所以懼生者於後也宜乎萬世無窮王祀孔子報德報功之無盡焉

河南邵氏曰春秋孔子之刑書也功過不相揜五伯者
功之首罪之魁也先定五伯之功過而學春秋則大
意立矣春秋之間有功者未有大於四國者也有過
者亦未有大於四國者也不先治五伯之功過則事
無統理不得聖人之心也

橫渠張氏曰春秋之書在古無有乃仲尼所自作惟孟
子為能知之非理明義精殆未可學先儒未及此而
治之故其說多鑿金

伊川程氏曰詩書載道之文春秋聖人之用詩書如藥
方春秋如用藥理病聖人之用全在此書所謂不如
載之行事之深切著明者也又曰五經之有春秋猶
法律之有斷例也律令惟言其法至於斷例始見其
法之用又曰學春秋亦善一句是一事是非便見於
此乃窮理之要他經非不可窮理也但論其義耳春
秋因其行事是非較著故窮理為要春秋以何為準
無如中庸欲知中庸無如權須是時而為中中非手

足胼胝閉戶不出之間所可取也視其當然之時則
閉戶胼胝各為其中也權之為言稱錘之謂也何物
為權義也時也亦只說到義以上更難說在人自看
如何又曰春秋傳為案經為斷又曰春秋之法極謹
嚴中國而用夷禮則夷之韓子之言深得其旨。又
作春秋傳序曰天之生民必有出類之才起而君長
之治之而爭奪息道之而生養遂教之而倫理明然
後人道立天道成地道平二帝而上聖賢世出隨時

有作順乎風氣之宜不先天

一作時

以開人各因時而

立政暨乎三王迭興三重既備子丑寅之建正忠質

文之更尚人道備矣天運周矣聖王既不復作有天

下者雖欲倣古之跡亦私意妄為而已事之謬秦至

以建亥為正道之悖漢專以智力持世豈復知先王

之道也夫子當周之末以聖人不復作也順天應時

之治不復有也於是作春秋為百王不易之大法所

謂考諸三王而不謬建諸天地而不悖質諸鬼神而

無疑百世以俟聖人而不惑者也先儒之傳曰游夏不能贊一辭辭不待贊也言不能與斯耳斯道也惟顏子嘗聞之矣行夏之時乘殷之輅服周之冕樂則韶舞此其準的也後世以史視春秋謂褒善貶惡而已至於經世之大法則不知也春秋大義數十其義雖大炳如日星乃易見也惟其微辭隱義時措從宜者為難知也或抑或縱或與或奪或進或退或微或顯而得乎義理之安文質之中寬猛之宜是非之公

乃制事之權衡揆道之模範也夫觀百物然後識化工之神聚衆材然後知作室之用於一事一義而欲窺聖人之用心

一本無心字

非上智不能也故學春秋者

必優游涵泳默識心通然後能造其微也。又曰春

秋大率所書事同則辭同後人因謂之例然有事同

辭異者蓋各有義非可例拘也

又曰有重疊言者如征伐盟會之類蓋欲

成書勢須如此不可事事各求異義但一字有異或上下文異則義須別又曰春秋之文一一意在示人如土功之事無大小一一書之其意止欲人君慎重民力也。胡氏曰詞同者正例也詞異則其例變矣

正例非聖人莫能立變例非聖人莫能裁惟窮理精義以學春秋者於例中見法例外通類也

武夷胡氏曰春秋魯史爾仲尼就加筆削乃史外傳心之要典也孟氏又發明宗旨以為天子之事者周道衰微乾綱解紐亂臣賊子接迹當世人欲肆而天理滅矣仲尼天理之所在不以為己任而誰可五典弗惇己所當敘五禮弗庸己所當秩五服弗章己所當命五刑弗用己所當討故假魯史以寓王法撥亂世反之正敘先後之倫而典自此可惇秩上下之分而

禮自此可庸有德必褒而善可勸有罪必貶而惡可懲其志存乎經世其功配於抑洪水膺戎狄放龍蛇驅虎豹其大要皆天子之事也故曰知我罪我者其惟春秋乎知孔子者謂此書遏人欲於橫流存天理於既滅為後世慮至深遠也罪孔子者無其位而託二百四十二年南面之權使亂臣賊子禁其欲而不得肆則戚矣是故春秋之作公好惡則發乎詩之情酌古今則貫乎書之事興常典則體乎禮之經本忠

恕則導乎樂之和著權制則盡乎易之變百王之法
度萬世之準繩皆在此書故君子以為五經之有春
秋猶法律之有斷例也學是經者信窮理之要不學
是經而處大事決大疑能不惑者鮮矣去聖既遠欲
因遺經窺測聖人之用豈易能乎然世有先後人心
所同然者一爾苟得其所同然者雖越宇宙若見聖
人親炙之也而春秋之權度在我矣。又曰傳春秋
者三家左氏敘事見本末公羊穀梁詞辯而義精學

經以傳為案則當閱左氏玩詞以義為主則當習公
穀如載惠公元妃繼室及仲子之歸于魯即隱公兄
弟嫡庶之辨攝讓之實可案而知也當閱左氏謂此
類也若夫來賄仲子以為豫凶事則誣矣王正月之
為大一統及我欲之暨不得已也當習公羊氏謂此
類也謂母以子貴媵妾許稱夫人則亂矣段弟也弗
謂弟公子也弗謂公子賤段而甚鄭伯之處心積慮
成於殺也當習穀梁氏謂此類也若夫曲生條例以

大夫日卒為正則鑒矣萬物紛錯懸諸天衆言淆亂折諸聖要在反求於心斷之以理精擇而慎取之則

美玉之與武砭必有能辨之者

左氏釋經雖簡而博通諸史敘事尤詳能

令百代之下頗見本末其有功於春秋為多公穀釋經其義皆密如衛州吁以稱人為討賊之詞也公薨不地故也不書葬賊不討以臯下也若此之類深得聖人誅亂臣討賊子之意考其源流必有端緒非曲說所能及也啖趙謂三傳所記本皆不謬義則口傳未形竹帛後代學者妄加附益轉相傳授浸失本真故事多迂誕理或舛駁其言信矣然則學者於三傳忽焉而不習則無以知經習焉而不察擇焉而不精則春秋之弘意大旨簡易明白者汨於僻說愈晦而不顯矣

欽定四庫全書薈要卷一千四百七十一

經部

春秋卷一

宋 張洽 撰

杜氏曰春秋者魯史記之名也史之所記必表年以首事年有四時故錯舉以為所記之名也

隱公

名息姑惠公之子母聲子謚法不尸其位曰隱○傳惠公元妃孟子孟子卒繼室以

聲子生隱公宋武公生仲子仲子生而有文在其手曰為魯夫人故仲子歸于我生桓公而惠公薨是以隱公立而奉之○公羊傳桓公幼諸大夫扳隱而立之隱於是焉而辭立則未知桓之將必得立也且如桓立則恐諸大夫之不能相幼君也故凡隱之立為桓立也○伊川程子傳曰夫子之道既不行於天下於是因魯春秋立百王不易之大法平王東遷在位五十一年

卒不能復興先王之業王道絕矣孟子曰王者之迹熄而詩亡詩亡然後春秋作適當隱公之初故始於隱公又曰詩亡者謂雅亡政教號令不及於天下也○泰山孫氏曰春秋之始於隱公者非它以平王之所終也平既不王東遷之後周室微弱諸侯强大朝覲不修貢賦不奉號令無所束賞罰無所加壞法易紀變禮亂樂弑君戕父攘國竊號在在有之征伐四出蕩然不禁天下之政中國之事皆諸侯分裂之平王庸暗歷孝逾惠莫能中興播蕩陵夷逮隱而極雅誥不復作天下無復有王矣故詩至泰離而降書至文侯之命而絕春秋乃作自隱公而始也

元年春王正月

元年者隱公之始年也古者諸侯之國各隨其君之年以紀事故不書是年為

平王之四十九年至於正朔則王所建也此所謂春乃建子月冬至陽氣萌生在三統為天統蓋天統以氣為

主故月之建子即以為春而丑寅之氣皆天之所以生
劉歆云三統者天施地化人事之紀天施周正建子也
地化商正建丑也人事之紀夏正建寅之謂也周正建
子在夏時則十一月也聖人雖欲行夏之時而春秋因
史作經方尊周以一天下豈遽改其正朔哉然古者記
事簡略多以事繫日以日繫月以月繫年至於事之以
大略見者乃繫事於時考之書如春大會于孟津秋大
熟未獲此事以大略見而繫時者也其餘記其日月則
不必繫時如伊訓惟元祀十有二月畢命惟十有二年
六月庚午肅其他如武成康誥顧命等篇皆月不繫於
時蓋止欲紀歲月故舉月則知時也春秋筆削史記以
立大法於元年之下王正月之上每歲四時必加謹春
夏秋冬之文者程氏所謂春天時正月王正書春王正
月示人君當上奉天時下承王正明此義則知王與天
同大而人道立者也正月加王示正月之必出於王也
正朔者天子所以奉若天道而敬授人時者也堯之歷

象舜之璇璣皆帝王之首政天下所當奉承者是時王政不行諸侯放恣不惟禮樂征伐不稟於周室而正朔之大亦國自為歷故考之唐志周魯宋各有歷法晉當獻惠之世大抵皆用夏正夫子示撥亂反正之法而特書王正月此公羊所謂大一統也示一統於此而禮樂征伐之專者以次而正焉此元年春王正月所以為謹始之書也不書即位蓋春秋假魯史以立法而時君之卑有難以顯言者故於筆削之際謹嚴以示褒貶隱公自立不由王命與先君之命故絀其即位恐其未著故特書正月以起之蓋諸侯之有國必受天子與先君之命則其有是國而治民也其身正而可以正國人矣苟或不然守天子之土而無天子之命守宗廟之典籍而不出於先君之傳付是二者一或闕焉君子有所不居今隱公兩皆無之蓋其父惠公本欲立桓公然惠公之薨桓尚幼諸大夫扳隱而授之位隱公欲成其父之志而懼桓之卒不克立於是立乎其位以俟桓之長而授

之然公之志雖如此而上不請于天子下不以告于方伯人孰知其果有與桓之實意哉又況居位十有餘年而大命不發讒說得行故胡氏以為諸大夫扳己而遂立乎其位是與爭亂造端而篡弑所由起春秋絀隱公即位所以著父子君臣之倫

三月公及邾儀父盟于蔑

邾公羊並作邾婁與禮記檀弓同蓋齊人語也蔑公羊穀梁作昧。三月建寅之月公隱公也魯侯爵而稱公者臣子之辭夫子魯人也書他國諸侯侵伐盟會則從其本爵而魯獨書公蓋父母之邦先祖之所逮事從臣子所稱之爵所以崇敬也及與也凡盟會侵伐內為主書及外為主書會所以別首從而謹善惡之首也邾今襲慶府鄒縣儀父邾君之字左氏曰邾子克也邾魯之附庸附庸之君例稱字盟約信誓神之事其禮蓋殺牲而共飲其血告誓神明若有背違欲令神加殃咎如此牲也蔑姑蔑魯地鄭樵曰今兗州瑕丘縣有姑蔑城盟

不書日遠而失之也。○公攝位而欲求好於邾故為蔑之盟夫繼好息民固有國之當然而殺牲要神則非為人上者相與講信修睦之道故書公之及盟以譏其未免徇習俗之私而不出於由中之信於是魯邾之好卒不能以夏五月鄭伯克段于鄆

鄭今鄭州新鄭縣鄆今

開封府鄆陵縣鄭伯名

寤生段鄭伯之弟大叔段也克勝也。鄭莊公之父武公娶于申曰武姜生莊公及共叔段愛段欲立之武公弗許及莊公即位為之請京使居之謂之京城大叔祭仲諫都城過百雉公曰姜氏欲之焉辟害對曰姜氏何厭之有不如早為之所無使滋蔓蔓難圖也公曰多行不義必自斃子姑待之既而大叔命西鄆北鄆貳於己又收以為己邑至于廩延子封曰可矣厚將得衆公曰不義不暱厚將崩大叔完聚繕甲兵具卒乘將襲鄭夫人將啓之公聞其期曰可矣命子封帥車二百乘以伐京京叛大叔段段入于鄆公伐諸鄆五月大叔出奔共

○春秋於諸侯之國事則稱國言君與大臣共圖之也於其君之父子兄弟出入誅殺之事則稱君著其君之志也仁人之於弟不藏怒不宿怨親愛之而已矣其或不中不才亦必正之以義使不格姦厚之以恩使不離富貴今莊公之於叔段無念鞠子哀之心而懷其母偏愛欲奪已位之恨授之大都而不為之所縱使失道以至於亂方其居京牧邑之時可制而不制如鷙鳥將擊而匿形於未發之先掩其惡以待其成及其逆節已露然後以寇讎之法討之以力勝為事必誅為期至於伐京伐鄆之日雖段之死於兵而有所不恤矣經不書其弟段固卑其不弟也然莊公非特以段之不才弃之乃其心實欲養成其惡待以寇賊無復天倫之念故書曰克段于鄆然後莊公伎忍之心施於同氣者舉形見於筆削之間矣。穀梁氏曰段失子弟之道矣賊段而甚鄭伯也何甚乎鄭伯甚鄭伯之處心積慮成於殺也。程子曰言勝之見段之強使之強所以致其惡也不書

奔義不繫於奔也

秋七月天王使宰咺來歸惠公仲子之賵

天

周平王也宰太宰咺其名來來魯也惠公隱公之父仲子惠公之妾惠公以去年薨仲子卒之年月不可知或亦去年也曰惠公仲子公羊傳曰兼之是也賵所以助主人送葬也車馬曰賵士喪禮公賵玄纁束馬兩天子賵諸侯之制未聞案惠公仲子皆已葬則此已不及事而追行其禮也。周王稱王耳春秋如天子於王之上見天子當奉若天道而行天之命如臯陶所謂命討典禮皆出於天王者奉而行之此春秋稱天王之義也天子於諸侯有賵禮所以褒有功德而辱其終也諸侯無再要之禮惠公牽於私愛寵庶妾之仲子而立為夫人正犯以妾為妻之戒潰亂夫婦之綱乃天討之所當加九伐之法所謂犯令陵政蓋此類也平王不能正惠公之辜反辱其送終之禮并寵妾之喪遺冢宰而來賵冢宰不能以紀法詔王乃奉命以賵亂倫之侯上僭之妾仲

尼以春秋之初方書天王以立法於是貶冢宰於上士
中士之例深臯其以百揆之尊瘞官失職一至於此貶
其臣則君可知矣凡春秋之書以尊者而貶從卑者
之列必有大臯極惡而後加焉不可以常事觀也九

月及宋人盟于宿

宋今應天府宋城縣。凡盟以國地者國主亦與焉及內之微者宋人外

卑者也。惠公之季年敗宋師于黃公立而求成焉故
盟于宿書此與蔑之盟同旨夫盟以結信終身不變可
也七年伐邾十年伐宋敗師取邑盟之不足恃斷可識矣冬十有二月祭伯來

祭周畿內

采北伯爵祭伯畿內諸侯為王卿士來來魯也。穀梁
傳來者來朝也其弗謂朝何也案內諸侯非有天子之
命不得出會諸侯不正其外交故弗與朝也禮聘弓鏃
矢不出竟場束脩之肉不行竟中有至尊者不貳之也
謹案內外之辨所以殊尊卑也朝必有玉帛聘必有幣
篚諸侯可以相交而王臣之與侯甸不可以相授受所

以絕人慾往來之私而嚴尊君事上之禮成周盛時防微杜漸之意殆必如穀梁氏之說矣經書祭伯來所以見周室法度至此蕩然故特

公子益師卒

傳曰衆父卒海陵胡氏曰

去其朝以立內外之防也與益師字衆父衆仲其後理或然也春秋於諸侯書卒書葬與魯君及夫人同於大夫書其卒而不書葬恩紀詳略之差等也君之卿佐是謂股肱股肱或虧何痛如之故問其疾弔其喪曜其葬臣鄰之義必厚其送終之恩此春秋大夫卒必書之旨也不書官程子曰諸侯之卿必受命於天子當時不復請命故諸侯之卿皆不書官不與其為卿也。愚案東遷以來王命不行諸侯不以天子之命為重故三命再命之制不復請於王而其強大者亦不守列國三卿之制如晉至於命六卿魯至宰之戰亦有四卿間雖有請於王如士會以黻冕命將中軍亦非復先王之制矣此春秋所以於列國大夫自宋統承先王修其禮物得自命官者或有司馬司城之書

而此外列國一切削之也大
夫卒必書日不日史失之也

二年春公會戎于潛

戎胡氏曰費誓稱淮夷徐戎此蓋徐州之戎久居中國在魯之東郊

者後書魯與戎盟會侵伐並同。趙氏曰凡戎狄不書爵號而君臣同詞。臨江劉氏曰與會者戎之君也不與君稱外之也王者內京師而外諸夏內諸夏而外夷狄正朔不加禮樂不及朝聘不與東方曰夷南方曰蠻西方曰戎北方曰狄雖大皆曰子有故也然後著其名爵外之也。杜氏註戎而書會者順其俗以為禮潛魯地。傳會于潛修惠公之好也戎請盟公辭。今案待戎之法驅之而已此費誓所以錄於書也惠公與之有好既失之矣隱公明內外之辨修我政而絕其好會可也不能絕之因與為禮登戎夷於堂陞遂來其盟誓之請雖辭於今竟不能却而與盟於後故於此書曰會戎所以譏隱公降國君之尊失中國之重不修政事以攘

夷狄以啓其猾夏之階觀夾谷之會所謂裔不謀夏夷不亂華之言則知書會戎之旨矣會狄會吳放此夏

五月莒人入向

莒國己姓今密州莒縣向小國姜姓炎帝之後漢志向屬沛郡杜氏註龍亢縣

東南有向城寰宇記屬應天府穀熟縣書人將卑師少人謂破其都城蹂踐朝市也。莒子娶于向向姜不安莒而歸莒人入向以姜氏還當時征伐不自天子出陵弱暴寡紛然無制莒以一婦人之故擅興兵入人之國都王法所當誅也

無駭帥師入極

駭穀梁作孩。無駭不氏未賜族左氏以為司空不書官

夫子削之也或曰無駭不書官氏未王命也極據孔氏正義賈逵以為戎邑書帥師用大衆也擅興大衆陵暴小國義與

秋八月庚辰公及戎盟于唐

杜氏註高平方與縣北有武唐

人向同亭今之單州魚臺縣也。傳戎請盟秋盟于唐復修戎好也。諸侯會盟皆有相期約行禮之日然會未有書

其日者至於盟誓必詳其月與日以其相與約信或尋或寒皆考於此固有國之所尤謹也前此蔑宿二盟皆不書日久遠失之耳至於中國諸侯與戎相詛尤不可之大者蓋盟者刑牲以相示謂神之殛倍約者當如此牲同類為之高以長亂戎狄豺狼而與之詛一有間隙惟利是視則求小疵而責大信必肆豺狼之暴為中國之大禍故春秋於唐之盟不特謹其日又特書及戎盟深皐隱公之失道而容其亂華也。胡氏曰後世乃有結戎狄以許昏而配偶非其類如西漢之於匈奴約戎狄以求援而華夷被其毒如肅宗之於回紇信戎狄以與盟而臣主蒙其恥如德宗之於尚結贊雖悔於終亦將奚及春秋謹唐之盟其垂戒可謂遠矣

九月

紀履緌來逆女

紀杜氏註在東莞劇縣漢屬北海郡今屬青州壽光縣履緌左氏作裂繻陸氏

云誤也今從公穀。履緌紀未賜族之大夫也不稱使公羊曰婚禮不稱主人今案劉夏祭公及凡諸逆女者

皆不書使蓋雖天子諸侯亦不自主婚所以養廉遠恥
故不稱使也女在國故稱女。稱大夫來逆女卿為君
逆夫人也今案春秋於婚姻事與卒葬同皆詳書于策
蓋送終之與謹始一也男女之配萬事之先天子諸侯
無出疆親迎之禮必使上卿往迎於其國至於所館然
後親迎以入此哀公問所謂大昏既至冕而親迎也紀
以卿逆猶可言也其或逆者微則輕配偶
而無以正一國之夫婦故具書以見得失冬十月伯姬
歸于紀伯姬魯女即履綸所逆者婦人謂嫁曰歸。臨
江劉氏曰歸于諸侯則尊同尊同則志程氏曰
內女嫁為諸侯夫人則紀子伯莒子盟于密左氏作紀
書逆書歸明重事也
從公穀曰闕文也當云紀侯某伯莒子盟于密左氏附
會作帛杜預以為裂繻之字春秋無大夫在諸侯之上
者也。胡氏曰凡闕文有本據舊史因之不能益亦
有先儒傳授承誤而不敢增必曲為之說則鑿矣

十

有二月乙卯夫人子氏薨

隱公夫人也薨上墜之聲書內之君夫人卒葬異於外尊

尊也不地夫人薨有常處也子氏不書葬者婦人從君

故君存則葬禮未備待君薨而合祔也本朝后雖先崩

必俟合葬於山陵

鄭人伐衛

衛都朝歌今滑州黎陽縣稱人將師少陸氏曰成

蓋古之遺制與

公以前侵伐書人者遠事難詳不必皆微者也凡師聲

皐致討曰伐無名行師曰侵。鄭共叔之亂段子公孫

滑出奔衛衛人為之伐鄭取廩延鄭人伐衛討公孫滑

之亂也諸侯擅興兵以侵伐已則當引咎或自辨喻之

以禮義不得免則固其封疆告于天子方伯今鄭聲衛

皐而不戰衛服故也衛服則可免矣鄭人擅興戎王法

所不

容也

三年春王二月

程子曰月王月也事在二月則書王二月在三月則書王三月無事則書時首

月蓋有事則道在事無事則存天時王朔天時
備則歲功成王道存則人紀立春秋之大義也
己巳日

有食之

不書朔史失之也非史之失則食不于朔也日
者人君之表日食君道所大忌唐歷志曰四序

之中分同道至相過交而有食天道之常以歷推春秋

日食大槩皆入食限於歷應食而春秋不書者尚多則

日食必在交限其入限者不必盡食若過至未分月或

變行以避之或五星潛在日下禦侮而救之或涉交數

淺或在陽歷陽盛陰微則不食或德之休明而有小眚

焉則天為之隱雖交而不食此四者德之所生也今案

歷家之言如此則凡日食者不可歸之常度而災之所

生乃德之不修也明矣況象見于上而災應于下自是

而後王政日微中國無霸夷狄僭竊禍亂滋起此春秋

所以特書以啓人主恐懼修省之心庶幾乎以德消災

而弭天下三月庚戌天王崩

之禍亂也
平王也在位五十一年崩
上墜之形天子崩不書名

至尊異於諸侯也喪服斬衰裳直經杖絞帶冠繩纓菅屨三年諸侯為天子之禮也天王之喪同軌畢至為臣子者以所聞先後奔喪禮也隱公聞喪而不奔春秋以來送終之禮薄矣聖經詳志以見魯惡之淺深今此平王之崩但書來討而魯人不往且志武氏子之求購則隱公之蔑視五十一年天下之共主視其喪葬無復臣子哀戚之情邈然不以動其心而自同於禽獸之倫惡極臯大不可勝誅不待貶絕而自見矣

夏四月

辛卯尹氏卒

尹氏左傳作君氏以為隱公之母聲子名稱義例皆無考據故當以公穀為正。尹

氏者王室之世卿詩節之首章指尹氏大師為致亂之人後此二百年立王子朝亦尹氏也則其為政於王室久矣乎王繼幽厲之後不能擇畀忠賢以修其政而因用致亂之族使之深根固柢而不可拔故春秋於此即其告終變例書氏以見平王不能中興周室之由而尹氏數百年相繼禍敗所以著世卿不擇賢之弊為後世

之深成也秋武氏子來求賻

武氏王之卿士稱氏亦世官其子未命也不稱使古者王崩百

官總己以聽冢宰故公羊傳曰當喪未君也。胡氏曰夫百官總己以聽則是攝行軍國之事也以非王命而不稱使於以謹天下之通喪而嚴君臣之義也。案惠公之薨宰咺歸昭而平王之喪隱公不奔臯不勝誅為政於王室者不能輔王以舉政刑而遣使下求於列國春秋直書以見其墮體失政取輕天下文武之澤漸然矣入隱公三年間經書周室止四事耳而人亡政熄王道之不能復興蓋已具見此春秋所以為簡明也

月庚辰宋公和卒

和穆公也名之諸侯下於天子且以別內外而謹始終之際也穆公者宣

公之弟宣公之薨也舍其子與夷而立之穆公疾召司馬孔父使之立與夷羣臣欲立穆公子馮公不許使馮出居鄭。程子曰吉凶慶弔講好修睦鄰國之常禮人情之當然諸侯之卒與國之大故來告則書

冬十

有二月齊侯鄭伯盟于石門

齊國名今青州臨淄縣石門齊地在濟南府臨邑縣

。齊侯僖公鄭伯莊公來告故書隱公十一年之盟而不食言者惟此石門之盟二君終身未嘗相伐蓋齊方盛強而鄭莊姦猾反覆之人也鄭之深仇專在於宋故鄭莊恃齊以敵之雖齊間與宋盟好而左右離間必使惟己之從是以石門之盟雖不寒而二國好合宋與許紀諸國交受八伐春秋詳書於策將使後人考其本末而知鄭莊多詐齊僖不義而強王政不綱諸侯放恣二國相與之固列國並被其禍也

癸未葬宋

穆公

穆公公羊穀梁作繆。卒自外錄從赴也葬自內錄往會則書穆諡也諸侯合請諡於王宋公爵也

其稱公與齊衛異矣然春秋自蔡桓侯之外皆不請於王而私諡者也。左氏曰天子七月而葬同軌畢至諸侯五月同盟至大夫三月同位至士踰月外嫺至此葬禮久近與當會者之節也。胡氏曰外諸侯葬其事則

因魯火其義則或存或削曷為或存或削春秋天子之事也諸侯於方岳之同盟其生講會同之好其沒有葬送之禮是諸侯所以睦鄰國也卒而或葬或不葬者何有急於禮而不葬者有弱其君而不葬者有討其賊而不葬者有諱其辱而不葬者有避其號而不葬者宋殤齊昭告亂書弑矣而經不書葬是討其賊也晉主夏盟在景公告喪書日矣而經不書葬是諱其辱也吳楚之君書卒者十亦有親送於西門之外者矣而經不書葬是避其號也急於禮弱其君而不會無其事闕其文魯史之舊也討其賊諱其辱避其號聖人所削春秋之法也

四年春王二月莒人伐杞取牟婁

杞夏后氏之後周之三恪國在今開封府

雍丘縣牟婁杞邑取者言非其有而恃力兼并之也。征伐天子之權土地諸侯所受之封莒人擅興兵以伐

人又取其地明伐不以臯志在貪其利故兩書伐取以見王法所當誅也。穀梁傳言伐言取所甚惡也諸侯相伐取地於是始

戊申衛州吁弑其君完

州穀梁作祝州吁衛莊公

故謹而志之也。嬖人之子不稱公子惡逆之首去其屬籍以誅之也。凡弑殺臣子言殺卑賤之意君父言弑積漸之名也。初衛莊公娶于齊曰莊姜無子又娶于陳曰厲嬀其娣戴嬀生桓公莊姜以為己子嬖子州吁有寵而好兵公弗禁莊姜惡之石碏諫弗聽其子厚與州吁游禁之不可桓公立乃老今年州吁弑桓公而立。謹案弑逆之事人道之大變聖人於易坤之初六言其理以為臣子而至於弑君父非一朝一夕之故其所由來者漸矣由辯之不早辯也衛國之禍始於莊公之寵州吁縱其好兵而不知禁公存之時妾上僭夫人失位見於衛詩則亂根之萌久矣殖之滋長終不能圖以致篡弑成於桓公既立之後春秋據事直書亦將使讀者原禍敗之所從

起而嚴履霜之戒也夫君臣父子夫婦之分一失其正則亂之所從生衛莊弱私愛而使內寵僭嫡嬖子害正石碯之諫足以悟矣愆而弗圖辯之不早貽禍後嗣可謂慘矣董氏曰為人君父而不通於春秋之義者必蒙首惡之名莊

夏公及宋公遇于清

遇者不期而會之名古者諸侯出疆朝天子若罷朝卒然相遇則近者為主遠者為客稱先君以相接所以崇禮讓絕慢易也春秋諸侯雖非相遇而欲

從簡易則以遇禮相見而不行朝會之禮故亦曰遇春秋因事而書以譏其非王事而出竟無國君之禮今公與宋公為會將尋宿之盟未及期衛人來告亂乃行遇禮而還故特書以譏之也

宋公陳侯蔡

人衛人伐鄭

陳今陳州宛丘縣蔡今蔡州上蔡縣。宋自殤公立公子馮出居鄭之後馮以穆公

不立己為恨有反取其國之心鄭莊又從而佐之於是宋殤與鄭為深仇矣及是衛州吁立欲求寵於諸侯以

定其位使告于宋求伐鄭以除子馮之害使宋為主而
率陳蔡以同役故宋公許之而四國同伐鄭也又擊鼓
詩怨州吁言從孫子仲平陳與宋則衛人乃公孫文仲
也。宋殤受國於穆公而馮有爭位之心正當修德和
民外好鄰國則其位自定而馮無所伺其隙矣況州吁
弑逆之賊內懷見討之懼而欲納交殤公苟知名其為
賊拒其邪說告于王而討之則一舉而父子君臣之倫
定中國之禍未至如後日之慘也今乃怵於州吁之邪
說合陳蔡以助逆賊之黨而首修怨於鄰國於是馮得
以自固於鄭而宋國之人不復知君臣逆順之正理自
是日從事於兵而弑逆之事卒及其身皆殤公不能早
辯於此役從自及也春秋書宋公為戎首蓋即事而臯
自見矣

秋翬帥師會宋公陳侯蔡人衛人伐鄭

翬魯大夫公子翬不

書公子隱公之臯人也傳宋公使來乞師公辭之羽父
請以師會之公弗許固請而行故書白翬帥師疾之也

誠如此言則隱公之弗許乃合於義而怵於翬之固請
君弱臣強正不勝而邪說行辯之不早孰明於此然再
書宋公陳侯蔡人衛人者乃重言以見其卑惡之不可
勝誅而左氏乃以為圍東門五日而還今復伐鄭此說
稽之經意事理殊為繆妄故前事亦未可深信要之隱
公不明大義使翬掌兵權以稔其惡初不待傳而可見
至於聖人以簡嚴之法作經當日書之重詞之複嗚呼
不可不察其中必有大美惡焉此年於宋公陳侯蔡人
衛人之書既敘之又重敘之所以反覆痛宋殤失計陳
蔡復無人黨亂賊以虛無辜視臣弑其君之大變不知
苟有人心所不為者而以為可親魯隱又從而翼之遂
使中國之人視之為常事宋魯陳衛淪胥繼亂學者於
此當知聖人傷世變扶天理之深旨不可
徇傳者之陋見而不明聖人之正意也

九月衛人殺

州吁于濮

濮水名在曹衛之間受河汴二水東北至濮
派分為二俱東北至鉅野入濟。傳州吁未

能和其民石厚從州吁如陳石碯告于陳請即圖之陳人執之衛人使殺州吁于濮石碯亦使其宰殺石厚于陳。稱人討賊之詞明國中人人得討之故凡作亂自立為君者其為國人所殺皆稱人言眾所共弃不以為君亦夫人所得討也。胡氏曰于濮云者不但紀地而已亦閔衛國之人著諸侯之臯也夫州吁二月弑君而不能即討者由四國連兵欲定其位故久然後殺之于濮耳夫以討賊許眾人而以失賊臯鄰國與賊者寡矣故曰春秋成而

冬十有二月衛人立晉

晉衛公子也傳衛人逆公子晉

于邢冬十有二月宣公即位今案名之而不書公子臯其無先君之命又無王命也程子曰衛人以晉公子也。可以立故立之春秋所不與也雖先君子孫不由天子先君之命不可立也故去其公子

五年春公觀魚于棠

觀左氏作矢非也棠濟上邑今單州魚臺縣有魯侯觀魚臺。公將

如棠觀魚者臧僖伯諫曰凡物不足以備器用則君不舉焉公不聽昔蓋戒舜曰儆戒無虞罔失法度罔游于佚罔淫于樂周公告成王曰毋淫于觀于逸于遊于田又曰無遑曰今日耽樂乃非民攸訓非天攸若蓋兢兢業業非禮勿動然後足以正國而治人一或惟耽樂之從則將以逸豫而滅厥德隱公忽臧僖伯之正諫而遠從事於遊觀非所以為君國子民之道春秋特書所以示人君當循禮遵法以隱公為戒也

夏四月葬衛桓公

桓公名完而謚桓蓋古不諱嫌名也弒十四月賊討而後葬是以緩

謚法辟土服遠曰桓謚者行之迹桓公見弒而加此謚又衛侯爵而稱公見國人私謚也。程子曰送終大事也不不請於王而私加以不正之謚知忠孝者不忍為也謹案程子之言深足以發明一經書葬之旨學者以此推之則知春秋之時為臣子

秋衛師入郕

郕公羊作盛。凡稱師將

卑師衆郕杜氏註云東平亢父縣有郕鄉今之單州任城縣也衛之亂也郕人侵衛故衛師入郕凡繼亂而立者必有懲艾革弊之政憤排圖治之思而後可以保國而圖終宣公遭大亂而得位既葬踰時首擅興兵以修怨為事則知其無尊王之心

九月考仲子之宮初獻六

羽考猶考室之考成也仲子解見隱元年仲子非正夫人不得祔惠公之廟隱為桓立故為其母築別宮宮

成而祭之也胡氏曰存則以氏繫姓以姓繫號沒則以謚繫號以姓繫謚者夫人也存不稱號沒不稱謚單舉

姓字者妾也此春秋所以正名而定夫人衆妾之分也羽翟羽舞者所執人持一羽凡舞有干舞有羽舞不曰

六佾而曰六羽羽以象文德干以象武功婦人無武事故獨奏文樂也。公羊傳曰六羽僭諸公也天子八佾

諸公六諸侯四。左氏曰考仲子之宮將萬焉公問羽數於衆仲衆仲對曰天子用八諸侯用六大夫四士二

夫舞所以節八音而行八風故自八以下公從之於是
 初獻六羽。程子曰成王賜魯以天子之禮樂祀周公
 後世羣廟遂僭用之仲子別宮以衆仲之言不敢同羣
 廟而用六羽故書初獻仲尼以魯之郊禘為周公之道
 衰用天子禮樂祀周公成王之過也。謹案周禮凡天
 子諸公諸侯之禮節度數各有等舞必有之論周室正
 禮當從公羊之說衆仲姑欲止用八之僭故畧諸公言
 之非周禮也曰獻者不宜獻也春秋於此書獻以見六
 羽不當用於仲子之廟書初以見八僭用於羣公之室
 一言而盡魯僭禮之本末非聖人莫能修謂此類也。
 常山劉氏曰魯僭天子禮樂春秋每事書之以正天下之典也
 邾人鄭人伐宋宋人取邾田邾
 人告於鄭曰請君釋憾於宋敝邑為道鄭人螟蟲食苗
 以王師會之伐宋入其郛邾人為道主兵也螟心曰螟
 國以民為本民以食為天螟
 為災國之大事也故記之

冬十有二月辛巳公子彊

卒

驅即臧僖伯諫觀魚者公曰叔父有憾於寡人寡人不敢忘葬之加一等杜氏曰葬者臣子之事非公家

所及故大夫不書葬

宋人伐鄭圍長葛

長葛鄭邑今潁昌府長葛縣是。宋殤以邾鄭伐己

之故報怨於鄭言伐言圍聲其卑而圍其邑經年乃取著其暴虐阻兵之甚也

六年春鄭人來輸平

輸左氏作渝臨江劉氏曰字之誤今從輸。輸者納也和而不盟曰平胡

氏曰平者成也鄭人納成于魯以利相結釋仇怨離宋魯之黨也公之未立與鄭人戰于狐壤止焉元年及宋盟于宿四年遇于清其秋會師伐鄭即宋魯為黨與鄭有舊怨明矣五年鄭人伐宋入其郛宋來告命魯欲救之使者失詞公怒而止其冬宋人伐鄭圍長葛鄭伯知其適有用聞可乘之隙也是以來納成耳。謹案鄭莊之納平非有講信修睦之心而深為合黨敵宋之計是以不憚屈己求和於魯繼以納祊而未即求許所以為

敗宋入許之權興魯隱亦入於其術中而不悟也故
惟胡氏之說為得春秋之旨學者不可不深考也

夏

五月辛酉公會齊侯盟于父

父杜氏註泰山牟縣有父山今之襲慶府奉符縣也

左氏曰始

秋七月

公羊傳此無事何以書春秋雖無事首時過則書四時具然後為年也。

平于齊也

何氏曰歷一時無事則書其首月明王者當奉順四時之正也有事不月者人道正則天道定矣

冬宋

人取長葛

宋自去冬圍長葛經年不解志於必取鄭莊不赴訴於天子方伯同列以求保其土地人

民反結交於魯以為後日報復之計而委長葛於宋稔禍長惡宋殤雖若得志而後日終受鄭莊報復虜國喪師以及其身春秋所深誅也

七年春王三月叔姬歸于紀

叔姬者伯姬之娣伯姬為紀夫人叔姬待年于父母

之國滕不書此特書者以其終不忘紀之五廟雖紀侯卒而歸于鄆以奉宗祀沒其身而後已聖人以其賢可以厲婦行將有其未必錄其本是以變滕侯卒滕國今徐州滕

例而特書之蘇氏所謂賢而得書者也縣也不名史闕文不書葬者魯不會也魯蓋為滕之宗國隱公怠於禮弱其君雖同宗之親同盟之國而不會

其葬春秋深著其夏城中丘中丘杜氏註在琅邪臨沂縣東北即今沂州臨沂縣

魯無敵國外患之警盛夏興役事無故之工築妨農害民非人君之心也春秋重民力之意程子及泰山孫氏

言之詳矣齊侯使其弟年來聘聘者諸侯遣大夫通好與國見於儀禮之篇詳矣然古者

諸侯間於天子之事則有邦交殷聘之禮自隱公即位以來未嘗朝聘於天子以魯推之則諸侯蓋可知矣而

齊僖因父之盟遽遣使於魯以結好忘君臣之大義植同列之私黨故觀年之聘則凡春秋書聘可以例推矣

書其弟又著齊侯寵愛之私也親親之道尊其位重其祿非賢則不及以政齊僖公愛其弟聘魯致女交政鄰國一一使之愛之之過遂致亂適庶之辯以啓年之子無知篡弑之禍聖人以其過於溺愛之私而失親親之義故不書公子而特書其弟以貶年而著後日之禍始於僖公之不早辯也公羊以為母弟稱弟程子力辯之學者不可不深考也

秋公伐邾

傳宋及鄭平盟于宿公伐邾為宋討也。夫和大者所以恤小既平

宋鄭則邾宋之睚眦亦可和矣親此而虐彼苟欲悅宋而忘蔑之盟子曰小人比而不周此足以見書為宋討

邾之

冬天王使凡伯來聘

凡伯周卿士凡國伯爵杜氏註汲郡共縣有凡城今濬州

黎陽縣之境魯隱即位未嘗朝聘天子而遣使聘之失王體矣

戎伐凡伯于楚丘以歸

戎見隱二年或曰此戎州己氏之戎本昆吾氏之別種周衰入居中國者也楚丘今拱州之楚丘縣漢為梁國

己氏縣此非衛之楚丘杜註衛地非也。天子之使入境而不衛地主之臯大矣。程子曰以歸則非執凡伯有失節之臯蓋以者言能左右之而為之以者亦聽其左右故凡言以歸者多責其降服而事讎也

八年春宋公衛侯遇于垂

宋殤衛宣垂近魯地不期而會曰遇此則簡禮相見以謀

事也左氏以為齊人欲平宋衛于鄭宋公以幣請于衛請先相見今以事理觀之宋衛本無隙而與鄭為深仇今欲求成于齊故相見以謀之耳必無齊欲平宋衛于鄭之事也觀此遇止二君素相與者而瓦屋之盟齊方

與焉則平齊可知也私交以植黨無諸侯相見之禮春秋之所惡也

三月鄭伯使宛來歸

祊祊公穀作邴。宛鄭大夫未賜族祊鄭朝天王于東方祀泰山之邑杜氏註在費縣東南今沂州之屬縣

也。鄭伯請釋泰山之祀而祀周公以泰山之祊易許田故使宛來歸祊凡諸侯有大功盛德於王室者京師

有朝宿之邑以待朝覲泰山有湯沐之邑以供朝方岳之祭祀魯周公之後也故成王賜許田於王畿之內為朝宿邑鄭桓公宣王母弟也故賜祊於方岳之傍東遷以來諸侯不朝王天子無復巡狩遂各以其所近之邑相易此謀始於鄭伯輸平之時先以祊歸魯蓋鄭所以固魯之好而未敢及許其辭則以為釋泰山之祀而祀周公所以免魯人不共先祖之臯而隱公猶未許其易許田也觀此則鄭莊之不憚委先祖所受王邑於人以合黨締交所謂將欲取之必固與之而後日會防之役卒使魯隱聞齊于宋以成敗宋人許之計又終得許田於魯春秋特書此以著世亂則姦謀遂視君父之尊真如弁髦而因以敝之以成其交征利之計所以見鄭莊為小人之雄臯

庚寅我入祊

此因鄭之歸我使吏治其地政而主有之也既不以

力得則當如齊人歸我濟西田不必書入祊可也書入者難詞又以見義不當受而據有之貪利忘上其惡大

矣

夏六月己亥蔡侯考父卒。辛亥宿男卒。

宿微國不書葬魯不

會不名史

秋七月庚午宋公齊侯衛侯盟于瓦屋。

瓦屋周地

闕之也

此則宋衛欲成於齊而齊侯從其請而與之盟也春秋之初皆離會之盟至此則三君共要質于神以示明信然宋殤王者之後齊僖東方之大國衛亦北州之大國夫民無信不立而三君合以要言宜可因此以率諸侯為講信修睦之事成鳩民息肩之圖而明年齊魯會防之後齊侯遂從魯以黨鄭又明年與二國伐宋取邑視今日盟誓之言不復顧忌比諸小人平時指天日為誓而他日臨小利害不一引手救反擠之又下石者正相似也嗚呼春秋於瓦屋之盟列數三君而又書日以謹之所以傷世變之甚悼人理之失者可勝言哉以是觀參盟之書庶乎可以見當時之事實而推聖經之旨矣

八月葬蔡宣公

蔡自共侯至桓侯書

于史記者其君皆稱侯今考父史記亦書曰宣侯而春秋以公書所以著臣子之私謚其尊之同於諸侯也

九月辛卯公及莒人盟于浮來

公羊穀梁作邑來案浮來莒地今沂州沂水縣

有浮來山。傳以成紀好也。隱公於小國不憚屈已而不明大義故猶汲汲於盟詛以國君之貴下比小國之大夫降班失列而不自知特書公及以著非螟蟲災害莒人之敵敵諸侯公蓋自失人君之體也螟稼民食所係故冬十有二月無駭卒

傳無駭卒羽父請謚與族公問族於衆仲衆仲對曰

天子建德因生以賜姓胙之土而命之氏諸侯以字為謚因以為族官有世功則有官族邑亦如之公命以字為展氏胡氏曰諸侯之子為大夫則稱公子其孫也而為大夫則稱公孫公孫之子與異姓之臣未賜族而身為大夫則稱名無駭扶之類是也古者置卿必求賢德不以世官春秋之初猶為近古此二卿所以書名也其

後官人以世而季友仲遂乃至以公子之身而賜之族使之世為大夫故春秋於其卒書公子季友仲遂而先王之禮亡矣其後至於三家專魯六卿分晉諸侯失國出奔者相繼職由此也觀春秋所書而是非之迹著治亂之效明矣案春秋無駭之卒與季友仲遂之卒實因卿大夫之告終以謹世變所以皆無駭挾之未賜族不為薄而季友仲遂之恩實過於厚過厚若隆於恩而先王之禮毫釐之過則生亂啓釁常必由之學者不可以不考也

九年春天王使南季來聘

南氏季字天子下大夫例稱字。程子曰王法之行時加

聘問以懷撫諸侯常禮也春秋諸侯不修臣職朝覲之禮廢絕王法所當治也不能正典刑而反聘之又不見答失道甚矣。今案隱公十年之閒宰咺凡伯南季三至魯庭以曾為周公之冑而欲親之也公不明尊王之

義以正其國而朝聘之禮不復行於王室於是諸侯視效而王靈竭臣子則象而篡弑萌皆隱公惡積而不可
揜之所致也春秋詳王使之來魯以三月癸酉大雨震
待讀者之自考則知隱公之辜大矣

電庚辰大雨雪

三月建寅之月劉向曰是時雷未可出
電未可見雷電已出見則雪不當復降

皆失節也雷電陽也雨雪陰也雷出非其時者是陽不
能閉陰氣縱逸而將為害也。程子曰陰陽運動有常
而無惑凡失其度皆人為惑之也。胡氏曰案陽失節
而陰氣縱公子翬弑逆之難其兆見矣春秋凡書災異
不言事應而其應具存明天
挾卒未賜族或曰隱不爵

大夫夏城郎

郎魯近邑書不時○襄陵許氏曰七年城

也中丘而伐邾今城郎而後伐宋公不務崇

德修政以戒蕭牆而念外人之有秋七月○冬公會齊
非干時動衆恃城保國亦已末矣

侯于防

防魯地今密州諸城縣有防城。傳宋公不王鄭伯為王左卿士以王命討之伐宋宋以入鄆

之役怨公不告命公怒絕宋使秋鄭人以王命來告伐宋冬會于防謀伐宋也。今案魯隱之志於與鄭而仇宋自伐鄭之役已見之矣況六年受輸平八年歸祊入祊其昵鄭之心已深故外為平宋之形鄭復以不王之臯加於宋則興兵有名而其義亦可以招齊於是隱公遂以不王之臯加於宋而為防之會假名義以動齊心俾齊僖背瓦屋之盟伐之而不疑此會防之謀所以為明年伐宋之地也左氏見其名而不察其實故書之如此殊不知鄭莊公特假此以誑齊魯耳觀桓五年繻葛之役則宋殤不王豈至如鄭莊之甚乎故不辯左氏之誣不足以知鄭莊魯隱之心而明聖人書會防之旨也

十年春王二月公會齊侯鄭伯于中丘

會于中丘為師期也

夏翬

帥師會齊人鄭人伐宋

程子曰三國先遣將致伐齊鄭稱人非卿也輩不稱公子與四

年六月壬戌公敗宋師于管

管宋地凡師皆陳曰戰詐戰曰敗公蓋不待齊鄭二

國謠以辛未取郕辛巳取防

郕防宋二邑。傳庚午鄭師入郕辛未歸于我庚辰

鄭師入防辛巳歸于我。今案鄭莊以齊之背宋從己

魯之力也故得二邑而不取郕魯取之春秋以二邑非

魯之版圖而遂有之故書取以著其無名而擅據之孟

子曰夫謂非其有而取之者盜也此胡氏所謂內小惡

直書而不隱者秋宋人衛人入鄭傳秋七月鄭師入郊猶在郊

宋人衛人入鄭。今案宋衛

乘虛以入鄭鄭莊勞民以務

宋人蔡人衛人伐戴鄭伯

外而不知守其國之故也

伐取之

戴公穀並作載。戴國舊城在今開封考城縣。傳宋人衛人入鄭蔡人從之伐戴八月壬戌

鄭伯圍戴克之取三師焉宋衛既入鄭而以伐戴召蔡人蔡人怒故不和而敗。程子曰戴鄭與也故三國伐之鄭戴合攻盡取三國之衆其殘民甚矣冬十月壬午齊人鄭人入郕傳討

命也。程子曰討不會伐宋也宋以公子馮在鄭之故二國交惡王臣不行王師不出矯假以逞其私忿耳

十有一年春滕侯薛侯來朝

薛夏奚仲之後國都在今徐州滕縣來朝謂朝魯也

。周禮凡諸侯之邦交殷相聘也世相朝也此乃閒於天子之事而講之穀梁氏謂考禮修德所以尊天子也凡諸侯朝各書之若穀伯鄧侯者偕至而朝禮不同日也累數之若邾牟葛及今滕薛者同日行禮惟天子可受之諸侯不當然也今隱於天子未嘗朝覲而滕薛相率以朝之又特見之而使同日旅見放臨江劉氏曰隱公之志已驕一旦朝兩國之君不能識其非禮也而受之非獨驕也志荒矣死不亦宜乎

夏五月

公會鄭伯于時來

左氏無五月時來公羊作祁黎。杜氏註滎陽縣東有滎城今屬鄭州會

謀伐許也秋七月壬午公及齊侯鄭伯入許

許今潁昌府長社縣書及內為

主也。傳七月公會齊侯鄭伯伐許庚辰傅于許瑕叔盈取鄭伯之旗螫孤以登壬午遂入許許莊公奔衛齊侯以許讓公公曰君謂許不共故從君討之既伏其軀雖君有命弗敢與聞乃與鄭人鄭伯使許大夫奉許叔居許東偏使公孫獲處許西偏。胡氏曰隱公即位十一年未嘗朝聘而受天王之使王室告喪而曾不奔赴以致求購擅征伐之柄為人而伐人忽天子先祖之賜田許人以相易之又入人之國而逐其君皆人臣之大惡也然則不善之殃豈特始於惠成於桓而隱之積亦不可揜矣故春秋所載善惡是非之迹施設於前而成敗吉凶之效見於後不可不察也。臨江劉氏曰公之不得其終以德薄而多功慮淺而數得意也備其四境

禍反在內可不哀與孔子曰人無遠慮
必有近憂不在顯史而在蕭牆之內也冬十有一月壬

辰公薨

書君薨必詳其地以示正終不地者不暇辯其
正不正而有不忍言者蓋弑也不書葬者君弑

臣子當戮力討賊以復君父之讎故賊未討則不敢葬
其不知討賊而遂葬者春秋絀其葬以見其臣子之不
忠孝而忘君父之讎也。傳公子翬請殺桓公將以求
大宰公曰為其少故也吾將授之矣使營菟裘吾將老
焉羽父懼反譖公于桓公而請弑之十一月公祭鍾巫
齊于社圃館于寫氏壬辰羽父使賊弑公于寫氏立桓
公而討寫氏有死者。胡氏曰致隱讓國立不以正惠
公之卑也致桓弑君幾不早辯隱公之失也既有讒人
交亂其間憂虞之象著矣而曰使營菟裘吾將老焉是
猶豫留時辯之不早辯也其及也宜隱公見弑魯史舊
文必以實書其曰公薨者仲尼親筆也古者史官以直
為職而不諱國惡仲尼筆削舊史斷自聖心於魯君見

弑削而不書者蓋國史一官之守春秋萬世之法其用固不同矣不書弑示臣子於君父有隱避其惡之禮不書地示臣子於君父有不沒其實之忠不書葬示臣子於君父有討賊復讎之義非聖人莫能修謂此類也

春秋卷一

欽定四庫全書叢要卷一千四百七十二

經部

春秋卷二

宋 張洽 撰

桓公

名軌惠公之子隱公之弟母仲子史記名允謚法辟土服遠曰桓

元年春王正月

春秋書王所以統諸侯正天下也桓公弑君自立故自三年以後不書王元年

書王以天道王法正桓公之臯蓋桓公雖無王而天理未嘗亡此元年所以書王正月也公即位

公桓

弑君而立周王之無政刑書即位見魯之臣子忘不共戴天

之讎而推戴弑君之賊弁冕南面立乎其位故桓公之編其書法大率異於羣公此聖人修理三綱敕正民彝

之大三月公會鄭伯于垂

公篡立而懼諸侯之討已欲外結好以自固因鄭伯嘗歸

訪以易許田而未遂乃求好於鄭鄭亦欲乘此機遂求
許田故與桓公會于垂簋弒之人凡民罔不慙而鄭莊
首與爲會故書公會鄭伯言鄭伯以壁假許田許者魯
出於鄭志所以深臯鄭伯也鄭伯以壁假許田朝宿之
邑在周之畿內而近於鄭田者近邑有田自隱八年鄭
莊使宛來歸訪意欲易許田隱公雖入訪而未與許田
莊公因是遂加壁以請田蓋其實易之矣書曰假諱之
也先王以賜周公之子孫爲朝宿之邑而桓公受壁以
喪其田故以爲國惡諱易言假以深
臯之內以諱爲貶蓋大惡然後諱也夏四月丁未公及
鄭伯盟于越越近垂地名盟結訪成也鄭人欲得許田
自安是以爲越之盟故書及言秋大水大非常也水非
內之志也交貶之以見其惡
陰盛惡逆之氣所感也冬十月

二年春王

桓無王而二年書王以天道王法正宋督之

即治于今誅之猶足爲奉天討正王法故桓二
年書王正月猶望王室舉九伐之典於是時也
正月戊

申宋督弑其君與夷及其大夫孔父

初宋穆公舍馮而立與夷使馮出居

鄭與夷既立而鄭莊公欲納馮於宋於是自隱四年以
後鄭宋屢相侵伐華督蓋馮之黨也將弑與夷而憚孔
父故先攻殺孔父殤公怒則弑之遂召馮而立焉公羊
傳曰孔父正色而立於朝則人莫敢過而致難於其君
者孔父可謂義形於色矣書與夷之弑而後
及孔父明孔父之死爲君故所以著其節也
滕子來朝

滕隱十一年稱侯今纔二年乃降爵稱子春秋以其始
朝弑逆之人特貶之也春秋於諸侯之爵不輕貶絕惟

有用夷變夏崇獎逆賊瀆亂三綱之臯者則黜之故吳
楚僭王杞莒用夷則黜號降爵而尤於亂臣賊子嚴其

黨惡之法此滕之始朝桓公所以特黜而從後日之稱子也胡氏論之詳矣

三月公會齊侯

陳侯鄭伯于稷以成宋亂

凡會未有言其所爲者此獨言其所爲蓋事關世變特書

以著之也宋先代之後統承先王修其禮物今有華督弑君之亂若四國之君有奉天討誅賊臣之舉如隱四年之誅州吁則亂不得成矣魯桓弑隱方以類合三國黨惡謀以賄行相與定公子馮于宋立華督而相之然後其亂始成無道遂立反易天常者得以肆其志於天下而文武成康之澤幾於滅熄此聖人所深懼而春秋之所爲作故直書成夏四月取部大鼎于宋戊申納于亂以深著四國之辜

大廟

部國名杜預曰濟陰成武縣東南有北部城部大鼎部國所造器也大廟周公之廟也納者不受而

強致之也。傳會于稷爲賂故立華氏也以部大鼎賂公齊陳鄭皆有賂。穀梁傳桓內弑其君外成人之亂

受賂而退以事其祖非禮也其道以周公爲弗受也秋七月紀侯來朝左氏作紀

而弱爲齊鄭所謀故來朝魯穀梁傳桓內弑其君外成人之亂已即是事而朝之惡之也不名不貶從滕子之

同同不必再貶也左氏曰杞侯來朝不敬杞侯歸乃謀伐之未知孰是蔡侯鄭伯會于鄧

鄧蔡地○始懼楚也小國間於大國而自立之道孟子告滕文公之三章詳矣徒懼而不能自強於爲善所以

不振九月入杞程子曰將卑師少外則稱人內則止云入某伐某公及戎盟于

唐修隱二年盟唐之舊好也冬公至自唐國君出竟朝覲會盟歸必告廟用牲而飲福史因記

其歸至與舜巡守歸格于藝祖之意同春秋因史策之書可以示法者存而弗削隱公十一年間其出疆盟會

侵入皆不書至久遠弗詳且失之也或曰不行告廟之禮也今桓公盟戎與盟越會稷同彼不書至而此獨記

其至者程子曰危之也桓公之初所與盟會皆同爲不義今遠與戎盟故危之而書至我若不如三國之黨惡則討之矣居夷浮海之意也中國既不知義夷狄或能知也○或曰春秋主魯何乃欲戎之討魯君乎愚謂聖人初未嘗以其主魯而廢拯救三綱之心況桓公之編正月不書王諸侯來朝者或貶之或人之或生名之與沐浴而朝告於哀公請討之意一也程子之傳精矣惟孟子知之故曰春秋成而亂臣賊子懼

三年春正月

正月不書王者胡氏曰桓弑君而立三年喪畢入見天子之時而王朝不舉殘執之

典鄰國不聞請討之事魯義不戴天之臣子反面事讎而不恥使亂賊肆其凶逆無所忌憚人之大倫滅矣故自是而後不書王見桓無王而公會齊侯于嬴嬴齊邑所謂嬴

公會齊侯于嬴

嬴齊邑所謂嬴

博之間蓋齊之東南邑○傳成昏于齊也杜氏註公不由媒介自與齊侯會而成昏非禮也○愚案亂臣賊子

與會而爲昏著

夏齊侯衛侯胥命于蒲

劉氏曰胥命者相命也古者有

齊侯之皐也

方伯有州牧有卒正有連帥命於天子正也諸侯自相

命非正也

齊太公之後東州之侯也衛康叔之後北州

之侯也以事相命也。愚謂東遷以來王政不綱諸侯

放恣賢伯之思自黍苗之作已可見矣

隱公而降中國

絲勢荆楚僭橫莫有任中國之事者獨齊衛爲列國之

望欲私天下之權於已遂起而圖之

西周方伯皆命於

天子今欲專之事出創見必求勢力之均相遜相先布

之天下耳目而不以爲異

然後強者乃敢專之故蒲之

胥命正齊桓非命伯而專征之始也王命不行諸侯以

力假仁者爲政於天下蓋基於此

此春秋所以特書而

謹之

六月公會紀侯于郕

左氏穀梁紀作杞今姑從公羊說見二年註。紀與魯親

也

而求援于魯以抗齊鄭故桓公因其二年來朝與之會也

秋七月壬辰朔日有食之

既既者日光滅盡也日食盡爲異尤大先儒以爲是後
荆楚僭號鄭伯拒王師射王中肩故太陽之食既

公子翬如齊逆女公子翬弑君之賊在隱世名之今乃
書公子或曰王命也或曰桓之黨也

君臣同弑隱公乃昏于齊以求配偶所謂不待貶絕而臯惡見者也
九月齊侯送姜氏于

謹公會齊侯于謹謹魯地禮送女父不下堂母不出祭
門聖人制禮不可過不可不及齊僖

愛其女之過至於越竟而送之遂使魯桓之出不爲觀
迎而爲齊侯在謹特往會之故僖公之送桓公之會皆

非所以重大昏而正人倫之
始春秋所以謹而書之也 夫人姜氏至自齊不言翬
之以夫

人至者公已受姜氏于謹也受之齊侯則姜氏既得見
乎公矣。胡氏曰不能防閑於是乎在禮者所以別嫌

明微制治于未亂不可不謹也。愚案春秋詳書于策
以見昏姻之際一違乎禮則始之不正而終無以正身

而正其家也

冬齊侯使其弟年來聘

致夫人也稱弟義見隱七年

有年

五穀

皆熟爲有年春秋常事不書而此獨書者桓公行惡其所感召如元年大水五年旱雩八年十月雨雪十三年大水十四年無冰御廩災等事十八年間獨今年五穀僅熟故以爲異特書于策以著桓公之卑憫魯國之民也

四年春正月公狩于郎

狩者冬獵之名周禮所謂遂以狩田是也春舉之者狩當用夏

時之仲冬在周正則正月乃其時常事不書而此特書以于郎非其地譏也凡國之蒐狩自有常處鄭之原圃秦之具圉皆擇山林翳密之地因田獵而從禽以奉四時之乾豆魯之大野乃田狩之地今不於常所而遠涉郎地則啓犯害民物蹂踐苗麥之愆足以見桓公心不在民而志於行樂此公狩于郎春秋所以特書而譏之

也
夏天王使宰渠伯糾來聘

天王桓王也宰大宰也渠采地伯爵糾名也天子之

大夫不名糾位六卿之長而名之以其爲天子之冢宰而不能詔王以八柄馭羣臣乃親奉命來聘魯桓是寵簋弑以瀆三綱故貶而名之也春秋奉天道以正王法以君天下者必敦典庸禮命德討辜以當天心然後輔相裁成之職盡而天地以位萬物以育故此二百四十年必具天時王月以見天之所以成一歲之運由人之賞罰政刑成位乎其中則天地之功全也今魯桓有弑君之辜王不能奉天討而反使冢宰聘之王者之職虧闕如此使三綱不建五常不立人類將變爲禽獸故於今年闕秋冬於冢宰聘魯桓之後以見天地之失其收藏萬物之失其成遂由王誅之不如於魯桓而寵秩之嗚呼此春秋之所以作而聖人尤致其謹嚴以示大法也者

五年春正月甲戌

陸渾曰此下文脫

己丑陳侯鮑卒

傳陳侯鮑卒於是陳

亂陳公子佗殺大子免而代之

夏齊侯鄭伯如紀

齊侯鄭伯僞朝於紀實欲襲之紀人覺之

其計不行而止春秋惡其懷盜賊之心而行朝事之禮書之若實朝于紀然所以抑強暴惡譎詐臨江劉氏所

謂聖人誅意之效者蓋春秋之初齊僖鄭莊皆小人之雄合謀同心以吞噬小國爲事自隱三年石門之盟至

桓十一年惡曹之盟二十年之間二國爲一伐宋取郕防入鄙入許今又相與謀紀自二君如紀之後紀侯多

爲計以謀自免於難而卒不能止齊鄭貪噬之心至莊五年使紀季以鄙入于齊紀侯去國然後快于心故春

秋之初小國困於強暴者二君之臯居多春秋詳其相與之迹所以深誅之也

天王使仍叔之

子來聘

傳曰仍叔之子弱也公羊曰譏父老子從政也此書大指以桓王頻遣使聘魯以寵亂賊又因

仍叔已老而子代任事故書以譏其不親有德又王朝之大夫父老則子從政世官不擇賢非周之法著周室衰亂之由也

葬陳桓公

○

城祝丘

○

秋蔡人衛人陳人從王

由也

伐鄭

初鄭武公莊公爲平王卿士王欲以政與虢鄭莊公怨王王曰無之故王子狐爲質於鄭鄭伯使公

子忽爲質於周平王崩周人將遂畀虢公政鄭莊公乃取周麥禾交惡始此六年鄭伯朝王王不禮焉八年虢

公忌父始作卿士于周今年王奪鄭伯政鄭伯不朝王以諸侯伐鄭鄭伯禦之戰于緇葛王師敗績祝曄射王

中肩○案左氏稱諸侯則其君必親從王春秋悉以人書而王不稱天蓋入春秋以來王室未嘗興兵伐諸侯

今一旦天子帥元戎啓行而諸侯從之若天討加於宋督魯桓則所謂仁不以勇義不以力而真足以大服天

下之心矣今桓王以小忿奪鄭伯之政又帥諸侯伐之而大姦大惡反易天常之亂臣賊子乃屢聘焉其失天

下共主之義非小過也遂致鄭伯敢於抗拒祝聃逆節加於王身而王靈至此竭矣故人諸侯而王不稱天此

與莊五年書公會齊人宋人陳人蔡人伐衛文十七年書晉人衛人陳人鄭人伐宋宣十年書晉人宋人衛人鄭人

曹人伐鄭襄三十年書晉人齊人宋人衛人鄭人曹人莒人邾人滕人薛人杞人小邾人會于澶淵皆卑其舍

逆亂稽天討致王法不行世變日降所以明用貴治賤用賢治不肖之法也鄭伯敗王師而不書者程子曰王

師於諸侯不言敗諸侯不可敵王也於夷狄不書戰夷狄不能抗王也此理也其敵其抗王道之失也聖人於

此一編經世變存王體之意無不具大雩雩祭有常祀所謂游夏不能與者謂此類也夫左氏所謂龍

見而雩蓋建巳之月角亢七宿以次昏見東方祭天爲百穀祈膏雨此春秋以爲常事不書者非常祀之月或

遇旱暵則因旱而舉故春秋書之以見災異然特加之大者諸侯之雩禱境內山川及百神耳今魯以周公故

得用天子禮樂雩及上帝用盛樂故特書大雩以志其
僭禮也。○程子曰成王尊周公故賜魯重祭得郊禘大
雩諸侯雩于境內山川耳成王之賜魯公之受皆失道
也故夫子曰魯之郊禘非禮也周公其衰矣歲之常祀
不能皆書故因其非時且過旱災而雩則書之所以見
其非禮且志旱也郊禘亦因事而書。○臨江劉氏曰禮
之有天子諸侯之別自古以來未之有改爲說者曰成
王康周公賜魯以天子禮樂成王者周之盛王也其亦
謹於禮矣昔者魯惠公使宰請郊廟之禮於天子天子
使史角往惠公止之其後在魯始爲墨翟之學使成王
之世魯已郊矣則惠公奚請惠公之請殆由平王以下
乎。○今案程子之說據明堂位及禮運劉原父說未知
所出姑存之

螽

程子曰蝗也既旱又蝗饑不在書矣

冬州公如曹

州稱公與祭公

同則州必畿內之地河內州縣也左氏乃云淳于公如
曹度其國危遂不復杜氏云城陽淳于縣州國所都昭

元年傳云城淳于或云因州公不反國爲杞所并遂以
淳于爲都未詳孰是曹姬姓武王封弟叔振鐸於定陶
爲曹國漢屬濟陰郡在唐
爲曹州今興仁府濟陰縣

六年春正月寔來

淳于公自曹來朝記禮者曰天子曰
非佗伯父寔來成二年傳王曰所使

來撫予一人而鞏伯寔來今案書州
公曰寔來以其不復國而略之也

夏四月公會紀侯

于成

紀來諮謀齊難公往會之成魯地此
與二年書其朝三年會于邾同旨

秋八月壬午

大閱

八月夏時之六月非蒐狩之時大閱天子之事非
諸侯之禮失時僭禮故書以譏之○程子曰無事

而爲之妄動也有警而爲則教之不素豈所以保其國
乎其不言公蓋懼鄭畏齊爲國講武非公之私欲也

蔡人殺陳佗

傳陳厲公蔡出也故蔡人殺五父而立之
五父即佗也篡大子免而立雖踰年而國

人不以爲君故稱陳佗蓋春秋之初先王之澤未泯人心之正理猶存故蔡人因人心之不君佗而殺佗立厲公○程子曰蔡人雖以私殺之而春秋書之同於討賊之例見殺賊者衆人之公也春秋討亂臣賊子之法務廣其塗而使之無所容於九月丁卯子同生傳以大子之地之間所以扶三綱也

九月丁卯子同生傳以大子之接以大牢卜士負之士妻食之公與文姜宗婦命之問名於申繻命之曰同蓋適夫人之長子備用大子之禮故史書于策春秋於此明與子之法在於正始明分其物采等衰殊絕於初則私愛之所不能行嬖孽之所不能干所以定國本息亂源也

冬紀侯來朝請王命以

其不稱世子未命于天子也

冬紀侯來朝求成于齊

公告不能程子曰紀侯不能上訴於天子近赴於賢侯和輯人民效死以守而欲求援於魯桓不能保其國宜也

七年春二月己亥焚咸丘

見其廣之甚譏淫獵也

夏

穀伯綏來朝鄧侯吾離來朝

穀據杜氏註在南鄉筑陽縣北今屬襄陽府穀城縣

鄧今之鄧州皆去魯絕遠桓公弑逆之人而二國遠來朝之故特名二國之君諸侯不生名生名惡之大也與反面事讎滅同姓以孤本根之臯無以異是年不書秋冬以諸侯相繼朝桓逆亂天道歲功不能成故不具四時胡氏曰大司馬之法賊殺其親則正之冢宰下聘則天下之望於王室者絕矣故四年去秋冬見天王之不能復能用刑也田恒弑君夫子告於哀公而請討今穀鄧遠朝則天下諸侯無復可望者矣故七年去秋冬見諸侯之不復能修其職也或曰然則邾牟葛來朝何以書秋冬程子曰四年與此明其義矣三國之來別立義也

八年春正月己卯烝

此夏正之仲冬當烝祭之月也常事書者以五月復烝故先錄此以

見其瀆于祭祀弗欽之端見於始矣

天王使家父來聘

家父天子大夫家氏父字家父仍叔

詩序皆有之與尹氏同或仍氏家氏世字如趙孟知伯世稱之也。程子曰魯桓弑立未嘗朝覲而王屢聘之

失道之甚也

夏五月丁丑烝

公羊傳常事不書此何以書譏何譏爾亟也亟則黷黷則不敬

君子之祭也敬而不黷。程子曰正月烝矣而非時復烝者必以前烝爲不備也黷亂甚矣

秋伐邾

微者冬十月雨雪

程子曰建酉月未霜雨雪記異

祭公來遂逆王后于

紀祭公天子之三公凡女在其國稱女今紀季姜在國稱王后者王命之則成所以別於列國用見王命之

重而存母儀天下之體於始也遂繼事。公羊傳曰大夫無遂事此其言遂何成使乎我也其成使乎我奈何

使我爲媒可則因用是往逆矣。愚案天子雖無親迎之禮然祭公謀於魯則當復命於王然後遣於宗廟以

明逆后之重今使魯爲媒而用是往逆輕褻王配如此
何以示正始之道哉故書若祭公之私行而以逆后爲
遂事以深譏之

九年春紀季姜歸于京師

桓王后也季字姜姓。公羊傳其辭成矣則其稱紀季姜

何自我言紀父母之於子雖爲天王后猶曰吾季姜。劉氏傳自歸者言之王雖有命未見宗廟則不敢處也。不敢處恭也。公羊傳京者何大也師者何衆也天子之居必以衆大之辭言之。傳凡諸侯之女行唯王后書。胡氏曰不盡書者唯過我與來告則書之也。

夏四月。秋七月。冬曹伯

使其世子射姑來朝

曹伯欲朝魯有疾不能行乃使其世子射姑奉命代已行朝禮于魯

凡爲人子立不中門坐不主奧不敢乘父之車示民有尊也。今曹伯有疾世子爲國之本不使之朝夕視膳以

尼姦邪窺伺之端而令弃國忘父越竟仇禮以朝魯桓夫春秋於桓方以誅亂賊之事望諸侯今曹伯之使世子世子從父之命揆之於義無一可者春秋所以直書而深貶之蓋經有從同同之例射姑之朝桓當以滕子穀綏鄧吾離之例推之而知其父子之悖人倫且忘其國家之大計也

十年春王正月

胡氏曰桓無王今復書者十盈數也天道周人事變故遠惡者十年必弃桓公

至是宜見誅於天矣
十年書王紀常理也

庚申曹伯終生卒。夏五月葬

曹桓公。秋公會衛侯于桃丘弗遇

桃丘衛地杜氏註衛侯與公爲會期

中背公更與齊鄭故公獨往而不相遇。○愚案下書三國來戰衛亦與焉則背信在衛直不告魯誤桓公至桃丘耳春秋爲國諱恥故言至桃丘而不相遇穀梁傳所謂弗內辭也
冬十有二月丙午齊

侯衛侯鄭伯來戰于郎

傳齊衛鄭來戰于郎我有辭也初北戎病齊諸侯救之鄭公子

忽有功焉齊人餽諸侯使魯爲其班魯以周班後鄭鄭人怒請師於齊齊以衛師助之故不稱侵伐程子曰來戰于郎三國爲主劉氏曰來戰者外爲志乎戰也孟子曰善戰者服上刑所謂爲志乎此戰是也愚謂此義施於戰而爲主者皆可通矣。謹案春秋以主客之辭辨用兵之曲直殘民之輕重其臯魯而書公及諸侯戰者多矣若今年郎之爭直以三國來戰言之蓋魯桓之當討固有臯極惡足以聲而致討齊衛鄭之君既不能奉天討而與之會盟矣今反徇私欲爭小故以無辭而伐有辭則臯在三國不容不反常例以明之故今年之書其文異其辭嚴專臯三國特書其來戰以示外有臯則爲主之例此聖經之特筆游夏所不能與者學者反復於此則所謂史外傳心之要典可得而識矣不言敗爲內諱

十有一年春正月齊人衛人鄭人盟于惡曹

胡氏傳微者盟會不

志凡志必君與貴大夫所爲也惡曹之盟即三國之君矣既不以道興師爲郎之戰又結怨固黨爲此盟故前書爵而以來戰著卑後書此盟而以奪爵示貶夏五月癸未鄭伯寤生卒。秋

七月葬鄭莊公。

九月宋人執鄭祭仲

鄭莊公娶鄧曼生忽立爲世子

宋雍氏納女于鄭莊公生突莊公卒雍氏欲立其出而雍氏宗有寵於宋莊公馮宋公誘祭仲而執之曰不立突將死亦執突而求賂焉宋公不書爵而稱人以其徇大夫之私意于諸侯之正統使之黜適立庶貶之也死難臣道也祭仲貪生畏死爲鄭正卿背先君之命而立庶孽故殺梁子曰惡祭仲也觀下書突歸于鄭則祭仲之卑突歸于鄭鄭忽出奔衛
突名以賤之卑其以庶孽見矣
違先君之命而篡國也鄭

忽以國氏明其正而異於突也不能有其位而制於權臣聽於鄰國其立其奔皆不由己是以不爵也歸者易辭以庶孽篡國而權臣主之鄰國助之舉國聽命曾無齟齬以致忽之無所容其身觀比事屬辭之旨則宋與祭仲之臯不可勝誅固已甚明而天子方伯之職不修以致姦狡強橫肆行而無所忌之實皆可見矣

柔

會宋公陳侯蔡叔盟于折

自去年魯與齊衛鄭爲仇敵至今年桓公欲合黨以敵之

於是結宋與陳蔡要言歃血初無忠信誠慙相與之心又以未命之大夫敵宋公陳侯故盟不足恃以久而桓公又與宋公屢會求以補前之失而堅宋之合然不知其不可也

公會宋公于夫鍾

地

冬十有二月公會宋公于闕

闕魯地在東平須昌縣東南

十有二年春正月。夏六月壬寅公會杞侯莒子盟于

曲池

平杞莒也平隱四年莒伐杞之怨曲池魯地

秋七月丁亥公會宋公燕

人盟于穀丘

燕人南燕大夫南燕姑姓國漢屬東郡今滑州胙城縣穀丘宋地在今應天府穀熟

縣○傳公欲平宋鄭故及宋公盟于句瀆之丘蓋宋之納突于鄭求賂而後使之入及突入國之後不能償其

責言遂成釁隙故桓公欲平之耳

八月壬辰陳侯躍卒

厲公也去年與柔盟于折不書

葬魯不會不恤同盟也

公會宋公于虛○冬十有一月公會宋公

于龜

傳宋成未可知也故又會于虛又會于龜今案虛龜皆宋地蓋桓公欲成宋之急而屈己連往宋地

與之爲會不知人之心不親非屢盟數會之所能回也故春秋詳書以譏之

丙戌公會鄭伯

盟于武父

宋公辭平故與鄭伯盟于武父與人交之道忠信誠懇本乎中則有不期合而合者其人

非有是心則其相與也不過以利合而一旦爭小利則相視忽如仇敵然公之見弃於宋而盟鄭其離合正如是春秋詳書之以見王政不行諸侯放恣魯桓宋莊鄭厲皆以篡國而立交相盟會紛紛離合惟利是視煩盟潰信祇以長亂王法之所必誅而不以赦者也

丙戌衛侯晉卒

泰山孫氏曰再言丙戌羨文

十有二月及鄭師伐宋丁未戰于宋

兵法曰爭恨小故不忍憤怒者謂之

憤兵兵憤者敗魯桓鄭突此役是也鄭突藉宋之力以篡國宋人責賂則背之而結魯魯桓爲突比與宋會盟及宋辭平曾不反已遽然連鄭以代之故書及鄭師伐宋臯魯鄭也又書丁未戰于宋言魯鄭與宋亟爭尋常殘民暴骨兩臯之也不言敗爲內諱也

十有三年春二月公會紀侯鄭伯己巳及齊侯宋公衛

侯燕人戰齊師宋師衛師燕師敗績

趙氏曰內兵以紀爲主外兵以齊爲

主蓋齊與三國之師伐紀欲滅之公與鄭救之而勝也○胡氏曰紀弱而遇齊以無道加於己必有引咎責躬

禮義辯論之文猶不得免則固封疆效死以守將必有能伸之者今紀不如是憤然藉魯鄭以勝之小國之勝

禍之首也況爲之援者乃弑君之賊篡國之人乎然則紀之不能保國蓋自此戰始矣此春秋主紀之旨也衛

侯晉未葬而稱爵以從金革取敗衄蓋此即朔與兄伋壽爭國者惡於立乎其位忘哀戚之心比事直書惡自

見矣戰稱帥師者故序三月葬衛宣公

方與衛戰往會列君臣敗稱師重衆也其葬怨不廢義

也夏大水

陰盛之災

秋七月。冬十月

十有四年春正月公會鄭伯于曹

厲公也與比年連兵戰伐修怨故來求好

而桓往會之

無冰

常燠也二之日鑿冰沖沖乃周正建丑之月固陰沍寒之時而不冰陰不能成物之

災○胡氏曰政治縱弛不明之所致也

夏五

無月字闕文

鄭伯使其弟語來盟

春二君會于曹矣又使語來涖盟以申固要約稱其弟語譏其寵愛同氣使之交政失友弟之義

秋八

月壬申御廩災

御廩者粢盛委之所藏也

乙亥嘗

四時之祭常事耳今書者壬申有御

廩災之變以先格王正厥事之誠心必遇災而懼未可以遽有事于祖考況祭祀用夏時此八月乃夏之六月未當時祭何爲汲汲然以四日之間遽舉嘗祭乎以是觀之則其無誠敬之心而所以供粢盛者苟簡蔑裂樂可見矣此春秋所以特書壬申御廩災乙亥嘗以責其奉宗廟之不誠且不敬也

冬十有二月

丁巳齊侯祿父卒○宋人以齊人蔡人衛人陳人伐鄭

傳宋人以諸侯伐鄭報宋之戰也焚渠門及大逵伐東
郊取牛首以大宮之椽歸爲廬門之椽以者行其意也
鄭突賴宋之力得入篡國歸而背其賂宋人因此與爲
仇讎魯桓平之宋人不從鄭遂與魯伐宋爲丁未之戰
宋以鄭突入用其寵而背之且至見伐積其憤怒乞師
於齊蔡陳衛以行其意蓋師雖四國之賦而左右死生
惟宋人之爲聽比於平日諸侯各率其師以伐人者又
不同故春秋書之以別之如左氏傳載則鄭之廟市四
郊無不殘破以逞宋人之憤夫國以師爲本而王制兵
師爲尤重今宋不反其黨庶孽徇貨賂之失而擅用列
國之兵以泄其私忿四國輕以兵假人而使之逞志聖
人所惡蓋有甚於樓諸侯以伐諸侯者此春秋特書曰
以以見宋與四國
之臯不可勝誅也

十有五年春二月天王使家父來求車

古者諸侯有功
則車服以庸蓋

王之五路自同姓以下其用之皆有等差非諸侯所得而私爲況可以天子之尊而下求於列國乎天子之畿內方千里租賦所入足以待諸侯諸侯之九貢亦無有以車供王室之用者上越禮以求之下違法而供之則示貪風於天下開賄道於邦國其失自上非小故也故特書天王使冢父來求車則周室微弱號令不行所求無藝以取輕於諸侯冢父爲大夫而無所正救奉使侯國自取辱命之辜具見矣

三月乙未天

王崩

桓王也

夏四月己巳葬齊僖公。五月鄭伯突出奔

蔡

祭仲專鄭伯患之使其壻雍糾殺之將享諸郊雍姬知之以告祭仲祭仲殺雍糾尸諸周氏之汪夏突出

奔蔡。聖人之大寶曰位蓋天子至尊而諸侯次之孟子論伯夷柳下惠得百里之地而君之皆能以朝諸侯有天下聖賢貴於得位以其足以恢弘斯道潤澤生民是以謂之寶其次中才之主苟能制節謹度用賢治民

自足以守其社稷何至位南面之尊秉一國之權而爲臣民之所逐哉故凡爲國君而失位出奔者春秋皆以自出書之所以臯其道之自失邦之自喪非臣民所得而逐之也其書爵而不名者臯輕惡淺雖曰失道而尚可以待其改過自新則其位爲未絕若突以庶孽奪嫡固不可以有國又初與權臣比而篡位又與親戚謀而欲殺之爲反覆盜賊之計以自取亡蓋

鄭世子忽復歸

王法之所當誅故特書其名以絕之也

于鄭

世子忽自十一年五月莊公卒而立至九月奔衛五年于外乃得復歸不從衛侯朔衍之例稱爵乃

稱世子者忽之所以得歸者以其嘗爲世子也所以不稱鄭伯者以其不能君也故程子曰忽稱世子本當立者不能保其位故不爵。劉許叔許莊公氏曰書復歸諸侯之正也

許叔入于許

許叔許莊公之弟隱十一

年齊魯鄭入許莊公奔衛鄭莊公使其大夫奉許叔居許東偏許乃先王封建之國叔既當立宜請于天子告

於大國以復先君之位乃不能以大義自信今因忽突
之爭竊入其國稱叔而不名著其當有國入者難詞以
其進無王命退非父授夫諸侯進以正乃可以正邦因
亂竊入已之不正無以正乎人故書入以見義有所不
受

公會齊侯于艾

艾公羊作鄆穀梁作蒿。傳謀定許也入許之役實鄭莊以壤地與許相

接欲滅而兼并之故糾合齊魯之力而同伐既入之後
齊魯俱遜而不受乃與鄭人今鄭既亂不能有則齊魯
遂爲之謀以定許叔之位此許之所以復存也

邾人牟人葛人來朝

牟國今登州牟平縣

葛古葛伯國今拱州寧陵縣諸侯來曰朝此即三國之
君矣乃人之者公羊傳以爲夷狄之也。何氏曰桓公
行惡而三人朝事之三人爲衆衆足責故夷狄之。謹
案朝桓多矣春秋獨於滕貶稱子穀伯鄧侯名之邾牟
葛人之者蓋滕子先諸國而朝穀鄧自遠而至此三國
者以諸侯之貴旅見於惡人之朝以事天子之禮事亂

臣賊子聖人安得不憫人心之失正懼天理之淪亡而深誅之與故特貶三國以示法而其餘則從同也孟子曰春秋天子之事也行天子之賞罰而五刑五用不加於貴賤尊卑憤然倒植若此之徒則所謂亂臣賊子

懼者爲秋九月鄭伯突入于櫟

櫟在陽翟縣今屬潁昌府鄭別都也。傳鄭厲

公因櫟人殺檀伯而遂居櫟十七年高渠彌弑昭公而立公子亶十八年齊人殺子亶祭仲逆鄭子于陳而立之莊十四年鄭傅瑕殺鄭子及其二子而納厲公厲公入又昭十一年申無宇對楚子虔曰鄭莊公城櫟而置子元馬使昭公不立由是觀之則害于國未大必折尾大不掉君所知也。謹案春秋止書鄭伯突入于櫟而自此以後忽亶儀之事皆不書者書櫟所以見大都耦國既入于此則鄭國之命已制於突與其國都蓋無以異特書入于櫟而略其入國者亦所以謹亂之所從生而俾爲國者必明於臂指運動之勢謹於家不藏甲

邑無百雉之城之禮又以見忽疊儀之爲君者冬十有
末矣而不足紀此春秋所以爲簡嚴之書也

一月公會宋公衛侯陳侯于袤伐鄭

袤公羊作侈。杜預曰袤宋地在沛

國相縣西南。傳會于袤謀伐鄭將納突也弗克而還
○穀梁傳地而後伐疑辭也非其疑也。○胡氏曰昭公
之與突是非邪正亦明矣然昭公雖正才不足以結四鄰之援
復歸于鄭日以微弱厲公雖篡其才足以結四鄰之援
既入于櫟日以盛強諸侯不顧是非而計其強弱始疑
於輔正終變而與邪穀梁所謂非其疑者責其疑於爲
義而果於爲不義相與連兵動衆納篡國之公子也故
詳書其會地而後言伐以譏之也。○謹案魯桓宋莊衛
朔皆以不正得國其爲突謀乃水流濕火就燥之
意獨陳侯疑之耳然寡不勝衆所以疑而遂合也

十有六年春正月公會宋公蔡侯衛侯于曹

謀伐鄭也於此又邀

蔡而與同事
黨益張矣

夏四月公會宋公衛侯陳侯蔡侯伐鄭

杜

曰蔡常在衛上今序陳下蓋後至。○呂氏曰當時諸侯皆以一切強弱目前利害爲先後不復用周班也。○程子曰突善結諸侯故皆爲之致力屢伐鄭也。○愚案自鄭突入國之後即比魯而仇宋及其出奔乃能使魯與宋自冬及夏悉力伐鄭所謂善結也。衛侯朔與母構兄亦姦惡之雄今復因同惡之合陵蔡侯而居其上春秋比事直書以見當時王政不行霸者未作小人恣橫恃其強衆凌暴寡弱可畏如此及桓文之興而後少抑焉當是時雖欲不與齊晉其可得乎

秋七月公至自伐鄭

孫氏曰助篡奪正踰時而返

冬城向

下有十一月即夏正九月不時也

十有一月衛侯朔出奔齊

傳初

衛宣公烝於夷姜生急子屬諸右公子爲之娶于齊而美公取之生壽及朔屬壽於左公子夷姜縊宣姜與公

子朔構急于公使諸齊使盜待諸華將殺之壽子告之
使行不可曰弃父之命惡用子矣有無父之國則可也
及行飲以酒壽子載其旌以先盜殺之急子至曰我之
求也彼何罪請殺我乎又殺之二公子故怨惠公十一
月左公子洩右公子職立公子黔牟惠公奔齊。公羊
傳衛侯朔何以名絕曷爲絕得罪于天子也。愚案朔
立已五年二公子不能獨逐之必因其陵蔑天子周室
欲討而後二子得以行其志所以莊六年王人子突救
衛公羊氏之說其必有所傳矣

十有七年春正月丙辰公會齊侯紀侯盟于黃

平齊紀且謀衛

案公十三年會紀侯敗齊師以益其怨今乃盟之豈足
以釋憾又朔得罪於天子而欲納之一動而二失也黃
地齊
二月丙午公及邾儀父盟于趯

傳作會公羊穀梁並作及今從之。高郵

孫氏曰及內爲志會外爲志儀父附庸之君非敢盟公公欲與之盟耳此當以及字爲定趙魯地

五月

丙午及齊師戰于奚

其不書夏闕文。穀梁傳內諱敗舉其可道者也今案不書敗者以背

盟興兵而殘民敗師諱之也

六月丁丑蔡侯封人卒

桓侯

秋八月蔡

季自陳歸于蔡

傳桓侯卒蔡人召蔡季于陳秋蔡季自陳歸于蔡蔡人嘉之也。何氏曰蔡侯

封人無子蔡季當立封人欲立獻舞而疾季季辟之陳封人卒反歸奔喪無怨心故稱字而賢之。劉氏曰季之去權也若季者道足以與權而不亂力足以得國而不居遠而不攜邇而不逼者也。今案復國於危疑之際考之書法惟蔡季爲善以其潔身而去一無爭心念宗國間召即歸能遠禍於未然不悻悻以爲高其去就合宜故春秋貴之

癸巳葬蔡桓侯

陸氏曰案史記世本左氏蔡之諸君

皆謚爲侯經皆稱公者以其私謚與僭同也惟蔡桓稱
侯蓋告王請謚王之策書則云謚曰某侯諸侯國史因
而紀之故特書之明得禮也啖氏曰蓋蔡季之賢請謚
於王也。劉氏曰稱爵禮也稱公非禮也稱爵者誅之
於天子者也稱公者非誅之於天子者也賤不誅貴幼
不誅長天子崩誅於郊諸侯薨誅於王大卒誅於君
及宋人衛人伐邾桓公春與齊邾盟既而皆背之戰奚
牲詔神玉帛交錯弃如敝屣蓋其爲人瀆信而好亂
不仁而佳兵人理滅矣宜其不踰年見殺於齊也冬

十月朔日有食之

不書日失之也

十有八年春王正月

高郵孫氏曰正月有王桓公之終也弑君之賊無可赦之理不見誅

於一時當見誅於歲月不見誅於其身當見誅於萬世

公會齊侯

于漵公與夫人姜氏遂如齊

齊傳公將有行遂與姜氏如齊申繻曰女有家男有室

無相瀆也謂之有禮易此必敗公會齊侯于漵遂及文姜如齊齊侯通焉公譎之以告○今案書漵之會不言

夫人者夫人不與行會禮也如齊不言及而言與者夫人伉也所以見夫不夫婦不婦進退制於夫人也故劉

氏以爲猶曰匹夫匹婦之相與云爾凡事之異於常者禍之所從起故觀公與夫人姜氏如齊之書即見其違

男女之常經而禍亂之所從生斷可識矣此夏四月丙

子公薨于齊

傳夏四月丙子齊侯饗公使公子彭生乘公公薨于車公羊曰於其乘馬拉幹而殺

之也魯人告于齊曰寡君畏君之威不敢寧居來修舊好禮成而不反無所歸咎惡於諸侯請以彭生除之齊人殺彭生春秋書魯君見弑之例有二在內則不書地以存其實在外則不容不書其地而以上下文之特異

者見之此先書公與夫人姜氏如齊而明年書夫人遜于齊又莊公不書即位則雖不明書齊人戕公而桓公之不得其死已昭然於書法之間矣蓋本國之事書之與他國同則非所以見尊君親上之意是以雖桓公之見殺不得不而不諱然又當存不沒其實之意以示後世之傳信故曰婉而成章也

丁酉公之喪

至自齊

公內不能正室外取禍於齊其致痛之也


秋七月。冬十有二月己

丑葬我君桓公

葬稱我君而後舉謚趙氏以爲臣子之敬詞蓋明言我君以舉其新加之謚然

後其詞恭且順不然則恐涉他國君而近於不敬矣公羊傳賊未討何以書葬雖在外也雖在外則何以書葬君子詞也蓋國有強弱勢有順逆今齊強於魯而天子既不舉九伐之法諸侯亦未有以方伯之事自任者故君子量力且假使書葬於可復讎而不復然後深責之也

春秋卷二



覆校官檢討臣李學錦

校對官庶士臣朱攸

謄錄監生臣李春和

欽定四庫全書薈要

經部

春秋張氏集註卷三

四



欽定四庫全書舊要卷一千四百七十三

經部

春秋卷三

宋 張洽 撰

莊公

名同桓公子母文姜謚法勝敵克亂曰莊

元年春王正月

不書即位桓公見戕於齊固不及有立子之命莊公之生雖以適冢書於經然

父之仇未討亦當告于天子以國事委冢宰而專以討

賊爲事今泰然居之曾不以父之無辜見殺於鄰國爲念但與桓公之初立不同耳是以削其即位蓋莊公之

不書即位比於桓宣之特書者固未至此而以人子之心處莊公之時當知莊之無志又非隱閔僖之比也此

春秋之旨唯深明乎時義者知之

三月夫人孫于齊

夫人文姜莊公母也魯人責其與聞

乎弑於是出奔左氏謂不稱姜氏絕不爲親禮也穀梁子曰人之於天也以道受命於人也以言受命不若於道者天絕之也不若於言者人絕之也臣子大受命蓋文姜之臯上通乎天爲魯之臣子者原先君見弑之臯固難以嗣君夫人所出而以恩揜義故斷以大義而去姜氏以絕之所以尊社稷而重本也古之聖人爲禮有等衰制服有輕重三綱之設以夫爲妻綱皆所以明天倫之正而使人知本以自別於禽獸者也

夏單

伯逆王姬

逆左傳作送考之春秋之例非也沉築館在秋如單伯果以天子大夫送王姬必俟館成

之後方至魯豈得預書之當從公穀作逆○單伯魯大夫不書名氏蓋周禮所謂公之孤四命也魯大夫而逆王姬者當是時王姬嫁于齊天子不自主昏而使魯主之王姬先至于魯然後往成禮于齊故魯大夫往逆于周也公羊氏曰逆者何使我主之也曷爲使我主之天子嫁女于諸侯必使諸侯同姓者主之諸侯嫁女於大

夫必使大夫同姓者主之此古者王姬下嫁之常禮也
常事不書而此特書之又不可不書如京師逆王姬穀梁氏
曰其義不可受於京師是也鄭君弒於齊使之主昏與
齊爲禮其義固不可受也春秋書此所以著魯居斬衰
而主婚姻已非禮之常而不可不辭矣況王室之女下
嫁齊侯而齊乃寢苦枕戈不可同天之讎奈何與之主
婚於此見魯之君臣無復讎之心而國之三綱至是絕矣

秋築王姬之館于外

所以

待王姬之舍以俟齊侯之逆也於廟則已尊於路寢則
不可小寢則嫌故必改築然魯主王姬前此必有其所
今特築于外者當是時知仇讎不可與接昏姻又哀麻
哭泣不可雜於吉事故築于外也然在平日爲可耳桓
公弒於齊未及一年其創鉅痛深當百倍於先君正終
之日又可以于外爲安而命國人以築齊王姬之館與
春秋所以詳書而著其忘父親讎之罪也

冬十月乙亥陳侯林卒。王使榮

叔來錫桓公命

榮叔周大夫榮氏叔宇錫賜也桓公已終而賜之命蓋莊公主王姬之昏故親

魯而寵嘉其父遣使賜之策命若昭七年衛襄公之卒王使成簡公追命衛侯之比也夫五服五章謂之天命

者誠以命德討臯上合天心然後足以昭示至公勸善懲惡今桓公之弑隱在王法有賊殺其親之臯乃司馬

九伐之所宜加周王非特不能討又以惡爲善示以褒嘉故春秋之例王必稱天而此年特去天而止書王以

見王之不能奉若天道趙氏以爲寵篡弑以瀆三綱也得春秋之旨矣

王姬歸于齊

王姬來而

不書至別於魯之夫人也書歸著莊公之忘親釋仇主婚而成禮也逆于京師築館于外而不書歸于齊則有

本無末無以見莊公忘仇之實矣

齊師遷紀邢鄆郛

杜氏註邢在東莞臨胸縣東南郛在

朱虛縣東南北海都昌縣西有訾城。齊欲滅紀故徙其三邑之民而取其地齊圖紀久矣今始遷三邑其民

之不服者迫遷之取其地而實以齊之民故稱師而書遷至是紀之力不足以自守駸駸於滅亡矣

二年春王二月葬陳莊公。夏公子慶父帥師伐於餘

丘慶父莊公之庶兄於餘丘公羊曰邾之邑也或曰小國而近於戎者其曰於餘若曰於越然未詳孰是。

莊公之立寢苦枕戈莫先於率一國以同仇於不義之齊捨是而命將帥師先有事於無辜之小國兵興無名

而公子慶父以尊屬得兵柄亦見於此莊公是時年才十五慶父得政以制一國之權軍政之本既失而權移

於下以成異日子般聞公篡弑之禍故春秋詳書以譏之。胡氏曰魯見弑者三君隱般子惡皆以翬慶父仲

遂先制其兵而後得以成篡弑之謀由辨之不早辨也豈不信哉。秋七月齊王姬卒禮記

檀弓曰齊告王姬之喪魯莊公爲之大功或曰由魯嫁故爲之服姊妹之服然則王姬比於內女而書卒禮之

常也至於舍不共戴天之讎而乃主齊夫人之喪則知有齊而不知有父莊公之臯可謂大矣故自單伯逆王姬以此章特書屢書辭煩而不殺以正其渙汨大倫誣滅天理之臯所謂婉而成章也冬十有二

月夫人姜氏會齊侯于禚

禚齊地公羊作郛下同○傳曰書姦也○趙氏曰姜氏齊

侯之惡著矣亦所以病公也曰子可以制母乎夫死從子通乎其下況於國君君者人神之主風教之本也不能正家如正國何若公者哀痛以思父誠敬以事母威刑以督下車馬僕從莫不俟命夫人徒往乎夫人之往也則公威命之不行哀戚之不至云爾○謹案春秋孔子之刑書也觀春秋書法如此則以孔子而當周公之任正文姜之罪必不免於管蔡之誅矣乙酉宋公馮卒

三年春王正月溺會齊師伐衛

溺不氏與無駭挾同伐衛爲納朔也命將出師

會仇讎而納衛侯朔蓋
不待貶絕而惡見矣

夏四月葬宋莊公。五月葬桓

王。王以魯桓公十五年崩至此七年乃葬。劉氏曰慢也。夫喪不過三年。天子七月而葬。此送終之大事。禮經

之不可進退者也。及是周室衰微。隱三年平王崩。時葬之禮諸侯莫之或講。而王室反遣使下求於列國。隱公

復不往會其葬。周室之喪禮至此掃地盡矣。方喪之制。自舜二十有八載之後。三代用之。至於此時。則不待漢

文之短喪而已先亡矣。今桓王七年而不葬者。必久喪以待諸侯之至。魯人聞喪期不過遣微者往會之耳。所

以既不書公如又不書卿大夫往而止。記桓王之葬也。同軌畢至之禮。既不復行。於是諸侯惡其害已而去其

籍。先王之喪禮僅傳於後世。惟有士喪既夕士虞耳。可勝惜哉。孔子序書而存顧命康王之誥。作春秋而於此

書葬桓王周室之秋紀季以鄫入于齊。季紀侯之弟諸盛衰可以參見矣。

鄆紀之邑杜氏註在齊國東安平縣今鄆州之境也齊
 欲滅紀元年又遷其三邑紀侯力不能抗欲去其國故
 使季以鄆事齊請後五廟當是時王政不行霸者未作
 強大吞并無道肆行小國不能校翼辭下敵以存宗廟
 至於如此以先王之建國而宗祀之存反聽命於強暴
 春秋所以於紀季無譏焉而書入以志其難蓋閔之也
 冬公次于滑公羊穀梁作郎○杜氏註滑鄭地在陳留
襄邑縣西北或曰今滑州也○傳公次于
 滑將會鄭伯謀紀故也凡師一宿爲舍再宿爲信過信
 爲次公以姻親之故閔紀之難已在朝夕而度其力終
 不能救故次師于滑將以鄭之不會而辭于紀耳非實
 有救紀之心也彼於父之讎尚忘之而不圖豈真有心
 於存紀哉故書次於滑
 見師出無名以深譏之

四年春王二月夫人姜氏享齊侯于祝丘

享公穀作饗
祝丘魯地

享燕兩君相見之禮享有體薦所以訓恭儉燕有折俎所以示慈惠婦人送迎不出門見兄弟不踰閭夾谷之會齊侯欲享魯君夫子猶以犧象不出門嘉樂不野合拒之豈齊侯文姜可以行之於祝丘乎假先王之禮而爲禽獸之行大亂之道也漢人有云淫亂之漸其變爲篡文姜之行潰亂周公之禮多矣魯人習之三十餘年卒至於子般閔公兩君見弑而後止聖人三月紀伯姬作易以閑有家爲家人之始垂訓遠矣

三月紀伯姬

卒

穀梁傳外夫人不卒此其言卒何也吾女也適諸侯則尊同以吾爲之變卒之也蓋諸侯絕傍期其姑姊

妹女子嫁於諸侯則尊同其卒也爲之服大功九月然不必皆書此爲紀侯去國而伯姬葬於齊侯因魯事以

備當時之變也

夏齊侯陳侯鄭伯遇于垂

齊襄公陳厲公鄭伯突也三國遇垂謀取

紀侯大去其國

紀侯不能下齊遂以國與紀季去之以違齊難大去者離其民社之守而

不反之詞也。○胡氏曰：與其不爭而去，是以異於失地之君而不名，不與其去而不存，是以書叔姬歸鄆而不錄。紀侯之卒，明其爲君之末矣。○愚按：紀之本末，自桓之五年書齊鄭如紀，以至元年三年凡關紀之存亡者，一一備書之，以見齊鄭圖紀之淺深有漸而卒成於今年也。紀之圖存雖其間不能無失然而困於強暴之陵迫委宗廟於其弟而後去之，故特書大去而不曰出奔，所以責強大閔小弱而寓興滅繼絕之志於言意之表也。

六月乙丑齊侯葬紀伯姬

齊襄欲滅紀雖其夫人尚在殯而迫逐其君以去之

其惡大矣尚以禮而葬其夫人君子以爲豺狼之行而爲婦人之仁加刃於人而以手撫之斥言齊侯以賤之

也秋七月○冬公及齊人狩于禚

公羊穀梁作部○公羊傳公不當與微者

狩蓋齊侯也齊侯而稱人諱與讎狩也公前此後此皆有事於齊而獨於此譏者譏其一以例其餘蓋通讎之

臯俱重不可勝譏而尤莫重乎與讎
狩故於此一譏而其餘從同同也

五年春王正月○夏夫人姜氏如齊師

言齊師則齊侯在焉曰如以見

魯道有蕩而夫人之行往來恣縱詩人所以有載驅之刺也

秋郕犂來來朝

郕公羊作倪犂

公羊穀梁作黎○郕蓋附庸國即小邦也杜氏云其後數從齊桓以尊周室王命以爲小邦子東海昌慮縣東

北有郕城犂來名也○常山劉氏曰夷狄附庸例書名犂來能脩朝禮故書曰朝蓋於此已能自進於禮也○

今案宋仲幾云滕薛郕吾役也則郕蓋宋之附庸非夷狄也而不得與邦儀父同稱字者臨江劉氏以爲未成

國謂之郕冬公會齊人宋人陳人蔡人伐衛納惠公也

齊侯宋公也其曰人何也人諸侯所以人公也其人公何也逆天王之命也

六年春王正月王人子突救衛

○正月公羊穀梁作三月王人下士也子突字

也救衛者奉天王之命以存黔牟而拒朔也朔搆兄篡國天討之所當加而子突能奉王命以救之春秋一經王旅之出而合司馬九伐之法者惟此一

夏六月衛侯

朔入于衛

名之又書入與鄭伯突同篡逆之辜也聖人持人伐衛諸侯於先又寢子突於後正名分

以示天討之當然誅黨惡以辜諸侯之同逆而於此書衛侯朔之入國則閔暴行之放恣憂正理之不明者爲如何哉自是而後又十餘年齊桓始霸然後諸侯知所一而百餘年間尊卑正否之權尚有所寄然後知二霸之作爲小補於秋公至自伐衛

書至與公至自唐之意世變之盛衰也

皆有當誅之辜故書至以危之也

螟○冬齊人來歸衛俘

二傳作寶胡氏曰案商書

遂伐三駿俘厥寶玉則俘者正文也寶者釋辭也○傳
文姜請之也衛俘衛朔所賂諸侯之貨寶齊人首惡故
主受衛之賂而分於黨惡助亂之國文姜又取以爲己
之功亦足以見齊襄之淫縱貪黷操貨賂之權以迷惑
人心者乃元惡大慝有王者作
則諸侯之不待教而誅者也

七年春夫人姜氏會齊侯于防

傳齊志也○杜氏註防魯地遠至魯地齊侯之

也夏四月辛卯夜恒星不見夜中星隕如雨

夜穀梁作昔隕公羊

作賓○恒星經星也經星不見夜明也杜氏以長歷推辛卯四月五日光尚微蓋時無雲日光不以昏沒如雨者言衆多不可爲數也此蓋王運將終而霸統方作之祥自此堯舜禹湯文武之紀綱法度掃滅殆盡○胡氏曰漢成帝永始中亦有星隕之異而五侯擅權秋大賊莽居攝此天示象於上而人事之必應者也

水

書大爲異非常也蓋文姜宣淫陰盛不制之所感也

無麥苗

穀梁傳麥苗同時也周之秋今五月

麥熟苗將秀因水漂盡民食乏絕有國之大事故書

冬夫人姜氏會齊侯于穀

穀齊

地杜氏註濟北穀城縣今屬郛州東阿縣○文姜元年以罪孫于齊後復宣淫自二年至今詳書于策敝筍載驅錄於齊風與衛之鵠之奔奔牆有茨諸篇論其時世皆一時之事魯衛先王之後婦行放逸同播其惡於萬民故詩謂之變風夫子曰二國之政兄弟也蓋不特周公康叔之盛而其世衰俗末政之陵夷亦相似如此閔公之篇慶父亂魯齊幾取之與衛之滅適同其時聖人以魯之事已詳於春秋故不復錄魯詩而齊詩之及魯事者以不刪而見之夫二南之風后妃不待閑而其德足以化天下後世閑有家之道廢而亡國敗家之禍同一軌轍詩易春秋之旨蓋相爲表裏學者不可以不考也

八年春王正月師次于郎以俟陳人蔡人

次止於外而過信宿也俟

者杜氏以爲待陳蔡同伐邲也不由王命妄興師衆久次于外無名而動期會莫應故書師次又書俟以深責

之甲午治兵

治公羊作祠。久次于外而與國不應衆也。心不一則有失伍逃亡之患故申明約束

將以訓齊其衆而不知出之以律已失治兵之本矣。雖欲治之其將能乎故書曰治兵治者不治者也。

夏

師及齊師圍邲邲降于齊師

邲公羊作成。陳蔡不至故會齊以圍之書及內之

志也。案左氏師及齊師圍邲邲降于齊師仲慶父請伐齊師莊公不可則公將而出矣魯與邲皆文王之昭蓋

同姓兄弟之當親者莊公忘親而志於取邲始擇易制之陳蔡與之同事而陳蔡不來然後不得已而要齊以

圖之所以邲不服魯而寧降于齊春秋直書以見其從讎而貪利資人以虐小二國同役而不同心敵遂得以

間之魯師之出大無功也故略公秋師還常山劉氏曰春秋書魯用

師未有如是之詳者蓋莊公此年之師尤爲非義上不稟天王之命無故次郎可謂無名甲午治兵可謂黷武

圍邾而邾降齊可謂無功歷三時而師還可謂害民夫逆天道親仇讎圍同姓勦民力與國不信伐國不服故

聖人備書之以見其惡○胡氏曰春秋正例君將不言帥師則以君爲重今莊公親將其及其還皆不稱公及

不書公至重衆也輕舉大衆妄動久役以勞民毒衆至是師爲重矣故皆不書公以著其辜此輕重之權衡也

冬十有一月癸未齊無知弒其君諸兒

無知公孫也書氏與翬州吁

同例舉於此後皆稱氏從同同也○齊侯使連稱管至父戌葵丘瓜時而往曰及瓜而代期戌公問不至請代

弗許故謀作亂僖公之母弟曰夷仲年生公孫無知有寵於僖公衣服禮秩如適襄公絀之二人因之以作亂

十二月齊侯田于貝丘反徒人費遇賊于門伏公而出
闕死於門中石之紛如死於階下遂入殺孟陽于牀曰
非君也不類見公之足於戶下遂弑之而立無知齊襄
之見弑以禍本言之則公孫無知之配嫡已積漸於僖
公之時而襄公之惡積而不可揜如抗王伐衛殺魯桓
公色荒禽荒暱比小人以至禍發蕭牆身殲賊手考襄
公即位以至於今春秋所書齊事無一非亡國戕身之
媒所謂積不善之餘殃者也徒人費石之紛如死而不
書逢君之惡比而不周胡氏所謂死不償責
者也或曰州吁無知不氏亦無駭挾之比也

九年春齊人殺無知

初無知虐于雍廩春雍廩殺無知
雍廩殺之而以討賊之辭稱人者

弑君之賊人無貴賤皆得殺之所
以尊君父廣忠孝而誅惡逆也

公及齊大夫盟于莒

公穀並作暨。杜氏註莒魯地琅邪緡縣有莒亭今之
沂州承縣也。大夫齊之大宰當是時齊無君蓋卿大

夫總已以聽者也稱大夫以其任一國之事而表異之故不名也與文七年扈之盟趙盾書大夫同公欲納糾故及大夫盟以定其約當是時齊國無君而爲之立嗣繼絕其德厚矣然忘不共戴天之怨而施德焉聖人明著之而繫以公伐齊納糾糾所謂不待貶絕而臯惡見矣

夏公伐齊納糾齊小白入

于齊

左氏作納子糾今從公羊穀梁作納糾案正義云今定本乃有子字則知左氏古本亦作納糾矣○

春秋書鄭忽及突曹羈及赤并此書糾及齊小白皆所以別嫌疑明正否也小白與糾之正否程氏論之詳矣莊公忘齊之仇而納其公子又所奉者不正故特書納糾以臯之桓公當立而書入無王命也

秋七月

丁酉葬齊襄公

無知已誅可以葬矣

八月庚申及齊師戰于乾時

我師敗績

杜氏註乾時齊地時水在樂安界岐流旱則竭故曰乾時○傳師及齊師戰于乾時我師

敗績公喪戎路傳乘而歸秦子梁子以公旗辟於下道
皆止○春秋書及而沒公又不諱內敗蓋復讎而敗雖
敗亦榮故不爲內諱獨莊公非有復讎之心而納不正以取敗故諱公以貶之也
九月齊人取

子糾殺之

鮑叔帥師來言曰子糾親也請君討之管召
鮑也請受而甘心焉乃殺子糾於生竇召忽

死之管仲請囚鮑叔受之以歸言於公而以爲相春秋
於上書糾正小白子糾之分也今書子糾而書取書殺
之臯齊人也糾者齊桓之天倫也以其不當爭而爭立
則爲臯以其骨肉之至親則不可殺爲齊侯者當列其
臯上告天子下告魯人且明示親親之義而全其生則
恩義兩得矣夫殺兄弟當目君而臯齊人者廢立之際
殺生予奪寄於當國大臣之手毫釐之差霄壤之繆今
齊大夫始以糾爲先君之子而盟欲立之謀不審於初
已爲臯矣及桓公得國又不體其君天倫之恩從議親
之辟以赦其臯而必殺之廢興生死輕率甚矣故加子

於糾又書齊人書取書殺則舉國之君臣同責其忘恩失義之辜也夫天倫之重苟未至如管叔之得辜於宗廟先君與天下之民則必當以親而全其生此聖人以至公之心示後世斷國論之權衡異於私天下爲己有欲絕亂本禍根而推刃先君冬浚洙洙水在魯城北齊之遺體者不可不深察也伐魯之道也魯雖殺子糾而猶有畏齊之心故浚而深之以備齊師之至春秋書此以見其不能明政刑結人心使大國畏之而重勞民力務以深險自守不知困民於無益古人徹彼桑土綢繆牖戶之計不如是之陋也

十年春王正月公敗齊師于長勺

書敗某師而不書戰惡詐戰也用民力以

戰爭古有司馬車戰之法定日刻期兩陳相向以決勝負雖敗而奔亦無多殺之禍若詐戰則出於不意或舉衆而覆之惟夷狄遷徙爲舉者不可以常法制故春秋自夷狄之外凡中國以詐勝者皆書某敗某師譏其待

中國之人以夷狄而深惡其不仁也。莊公政刑不修，制軍無法，齊師之來以詐而僥倖一勝。此書公敗齊之旨也。或曰：長勺魯地，而齊師至此，即所謂敵加於已，不得已而應者矣。何以責魯乎？胡氏曰：文告不修，疆場無備，德已衰矣。況兵刃相接，又以詐取勝乎？

二月公侵宋

故書魯為主以責之，已亂寡怨之方也。莊公以僥倖得志於齊，遂舉無名之師以掠宋境。此所以召郎之師也。○胡氏曰：凡師聲臯致討曰伐，潛師掠境曰侵。三月，宋人遷宿。穀梁傳：遷亡辭也。其不地宿，不復

三月宋人遷宿

見也。杜氏註：遷而取其地，故異於

邢。遷○襄陵許氏曰：遷之使未失其國家以往其義，猶有所難，則是王澤之未竭也。至僖文以後，則有滅國無

遷國矣。夏六月，齊師宋師次于郎，公敗宋師于乘丘。乘丘魯地。

今興仁府乘氏縣。傳：齊師宋師次于郎，公子偃曰：宋師不整，可敗也。宋敗齊，必還自雩門，竊出蒙臯，比而先

犯之公從之大敗宋師於乘丘齊師乃還○臨江劉氏曰二國揚兵駐師而不名所伐欲闕利乘便快攻取之意魯又不能推忠信奉文告以止齊宋之師而出奇計詐謀以覆滅其軍次者不以義勝者不以道交譏之也

秋九月荆敗蔡師于莘以蔡侯獻舞歸

荆楚之故號也周成王初封熊

繹于丹陽今江陵之枝江縣也自荆子熊通侵伐漢東諸侯其國始大僭號稱王今其子熊貲始敗蔡浸猾夏矣○傳蔡哀侯娶于陳息侯亦娶焉息嬀將歸過蔡蔡侯弗賓息侯怒使謂楚文王曰伐我吾求救於蔡而伐之楚子從之遂敗蔡以獻舞歸不稱人及師夷狄之也臨江劉氏論之詳矣書以歸而名獻舞責其不死於位生降夷狄也諸侯不生名名之則位已絕矣於此見王政不行夷狄憑陵中國楚自此得志中夏者二百餘年而周之子孫日以陵夷

冬十月齊師滅譚譚子奔莒

譚國

在今濟南府歷城縣。○傳齊侯之出也。過譚譚不禮焉。及其入也。諸侯皆賀譚。又不至。冬齊師滅譚。滅者夷其社稷。覆宗絕祀也。譚子爵而不名。以其雖失國而恥反。面事讎。猶有興復之望也。不書出國。已滅無所出也。齊桓方有志尊王室爲政於天下。非特不能興滅繼絕。而以私憾覆滅小國。其辜大矣。○薛氏曰。五霸桓公爲盛。威陵諸侯以圖霸功。首滅天子之建侯。以肆威耳。儒者之不道也。宜哉。

十有一年春王正月。○夏五月戊寅。公敗宋師于郕。魯

地。○傳宋爲乘丘之役。故侵我公禦之。宋師未陳而薄之。敗諸郕。宋師再至再敗。兵禍旋及其君。魯雖再勝。其國亦困。秋宋大水。此外災也。蓋陰盛陽微之徵。外災不於兵矣。書此特書者。宋來告魯。弔之也。傳公

使弔之曰。天作淫雨。害於棗盛。若之何不弔。對曰。孤實不敬。天降之災。又以其爲君憂。拜命之辱。此見怨不廢禮。

與諸侯往弔主人。臯已之辭，蓋古意之猶存而未泯者也。雖然，文豈足以應天哉？閔公不能踐敬之一言，而以靳宋萬自禍，乃董氏所謂出災害以謹告之，而不知變者。春秋之存災異，可不察哉？

冬王姬歸于

齊

傳：齊侯來逆，共姬此所謂齊侯之夫人。三王姬者也。魯主仇讎之昏，可以辭于王而不辭，然仇已易世異

於元年之新，有大故，所以雖齊侯之來逆而不復書止書王姬之歸，以譏之也。王女下嫁，曾無以異於諸侯之女。適人者，蓋車服不繫其夫，雖以示恩愛之隆，而陰陽之位，夫婦之道，乃三綱之所繫，不可不早正。故因其始嫁而一之於諸侯，女歸之辭焉。若曰：往之女家，必敬必戒，是有常禮，不可紊也。此可以觀抑揚而得乎義理之中者矣。

十有二年春王三月紀叔姬歸于鄆

叔姬伯姬之娣，隱七年歸于紀者，紀

侯大去其國之後死於他國叔姬還魯至是乃歸于鄆
蓋伯姬既死叔姬實攝內事而能不以國之存亡貳其
事君子之心不以身之榮悴變其奉宗廟之志故必歸
于鄆以終其身易曰眇能視利幽人之貞於叔姬見之
矣鵲巢之德不過如此春秋可不錄其本末以示婦道之正乎
夏四月○秋八月甲午

宋萬弑其君捷及其大夫仇牧

捷公羊作接○萬南宮長萬多力之士乘丘之

役公以金僕姑射萬公右欲孫生搏之歸散舍諸宮中
數月而後歸之宋人請之反爲大夫與閔公博婦人在
側萬曰甚矣魯侯之淑且美也天下諸侯宜爲君者獨
魯侯爾閔公矜此婦人顧曰此虜也爾虜焉故魯侯之
美惡乎至萬怒搏閔公絕其脰仇牧聞君弑趨而至遇
諸門手劒叱之萬臂掇仇牧碎其首齒著乎門闔已而
遇大宰督于東宮之西又殺之春秋取仇牧遇弑父與
君之賊而能不畏強禦死於其難故書及以壯之華督

以弑君名列於亂臣賊子身爲元惡死不償責固不得而書也冬十月宋萬出奔陳宋

弑君而立子游羣公子奔蕭公子御說奔亳南宮牛猛獲帥師圍亳冬十月蕭叔大心及戴武宣穆莊之族以

曹師伐之殺南宮牛于師殺子游于宋立桓公猛獲奔衛南宮萬奔陳宋人請猛獲于衛衛人歸之亦請南宮

萬于陳以賂皆醢之今不曰宋人殺萬而書宋萬出奔陳者歸惡于陳也天下之惡當奉天討容受其奔臯已

大矣受賂而後歸之所謂肆人欲而滅天理與所謂殺其人汙其宮而瀦焉之意何其異哉此所以當服黨惡

之臯也

十有三年春齊侯宋人陳人蔡人邾人會于北杏齊侯

作齊人北杏齊地○傳會于北杏以平宋亂○今案四國稱人蓋齊桓欲合諸侯行霸事恐諸侯之未諭故未

欲煩其君而使其臣來會告以平宋亂舉霸者之事也
晉悼公合諸侯于邢丘以令朝聘之數而使諸侯之大
夫聽命故自鄭伯之外齊宋衛邾皆稱人殆公之故事
與自東遷以來王政不行下逮隱桓之世亂賊得志強
暴肆行天下之心思周道之不可復見而願得賢伯之
興以息亂賊制強暴蓋已久矣桓公入國今已四年因
宋有弑君之亂首惡方誅嗣君新立合諸侯以定宋亂
而陳蔡邾並來受命亦可見天下歸之幾如水之就下
矣然威公苟能於宋萬初弑君之時舉兵討之而定其
亂則不勞告諭而天下自翕然宗之亦不待今日而齊
矣經書宋萬出奔陳而繼之以此
夏六月齊人滅遂
又因見桓公自失幾會於始也
杜
氏註在濟北蛇丘縣○傳齊人滅遂而戌之滅國之說
胡氏論之詳矣於此見其已亡惻隱之心故凡其合於
仁者孟子皆
秋七月○冬公會齊侯盟于柯
柯今東平
府東阿縣
以爲假也

莊公自齊桓入國屢與之戰雖一再勝而齊方修軍政以圖霸魯有見伐之虞至此始及齊平齊桓亦知魯未可取故不復以用於譚遂者待魯公穀載曹子之事蓋魯人知桓公之圖霸因盟以求地齊亦有求諸侯之心捐小利以收魯容或有之但公羊氏言之已過其實而戰國之士又從而增益之耳此亦足以見桓公之屈意以和魯皆霸術也

十有四年春齊人陳人曹人伐宋

將卑師少曰人○宋人背北杏之會故齊

帥近宋二國以伐之○程子曰齊自管仲爲政莊十一年而後未嘗興大衆也其賦於諸侯亦寡矣終管仲之身息養天下厚矣至於秦晉使之不競而已不強致也是以其功卑而易成○愚案伐宋而同陳曹皆宋之鄰不動遠國亦簡便之規模也

夏單伯會伐宋

單伯見元年逆王姬註魯大夫之貴者○魯自

盟柯已平于齊而未從其役故因齊之討宋命上卿率師往會以示從霸之意齊桓方興理勢當從固異於羣之會宋殤黨亂賊以伐無辜矣是

秋七月荆入蔡

案傳蔡哀

侯爲辛故譽息嬀以語楚子楚子如息以食入享遂滅息以息嬀歸生堵敖及成王焉未言楚子問之對曰吾一婦人而事二夫縱弗能死其又奚言楚子以蔡侯滅息遂伐蔡而入之觀此則息之亡蔡之入皆哀侯致之惟干戈省厥躬亦足見蔡自會鄧懼楚之後非但不爲徹桑土繆牖戶之謀而以婦人之故再召楚師始則身虜繼以國破楚熊貲興兵以悅婦人當是時齊桓之業未成遂致其橫行淮漢浸及中國故特書蔡之見入楚之猾夏兩

冬單伯會齊侯宋公衛侯鄭伯于鄆

鄆衛地今之濮

州鄆城縣○傳宋服故也宋公親會魯卿始與爲衣裳之會而齊霸略定矣

十有五年春齊侯宋公陳侯衛侯鄭伯會于鄆

傳以爲齊始霸

蓋指諸侯始定而言然魯未信服而自是之後宋人猶或主兵衛鄭未免復叛蓋齊之霸業駸駸向定而諸侯

之心猶未一也

夏夫人姜氏如齊

文姜不如齊八年矣至是復如齊者蓋鄆之會魯莊不與

此行殆出於文姜之意齊侯欲求魯好以定霸業而不之拒也文姜播惡於齊襄之時桓公欲圖霸業則絕之於齊義也以欲求魯之故而不監覆車之轍豈非未聞行一不義雖得天下不爲之法乎此孔門所以不道霸者而春秋特書

秋宋人齊人邾人伐郕

郕公羊作兒○案傳諸侯爲宋

伐郕蓋小邾宋之附庸而不服宋故桓公爲宋伐之宋序齊上蓋是時伯體未全正此役爲宋而興亦猶伐宋之師邾人爲道而

鄭人侵宋

間諸侯伐郕而侵宋不誼於服齊而背二鄆之會鄭

之反覆於齊楚冬十月
之間蓋始於此

十有六年春王正月○夏宋人齊人衛人伐鄭宋序齊上與伐

鄭同伐鄭不止爲宋而已蓋秋荆伐鄭案傳鄭伯自櫟入緩告于楚以

此受伐蓋齊霸未定楚之威浸及於中國自桓二年鄭已懼楚而會鄧至此三十餘年而後受兵楚之威不輕

用蓋如此至是冬十有二月會齊侯宋公陳侯衛侯鄭始爲中國患矣

伯許男曹伯滑伯滕子同盟于幽公羊會上公字左氏無曹伯今從公羊

穀梁○幽宋地滑國河南緱氏縣或曰今滑州也陳自入春秋以來常列衛下今在上者杜氏曰齊桓始霸楚

亦始強陳介于二國之間而爲三恪之客故齊桓因而進之遂班衛上○臨江劉氏曰同盟者何殷同之盟也

古者諸侯之於天子春見曰朝夏見曰宗秋見曰覲冬見曰遇時見曰會殷見曰同同盟之禮見於覲禮爲壇祀方明方伯臨之古者六歲而會十二歲而盟桓非受命之霸也假同盟之禮率諸侯以尊天子蓋自是始霸也○愚案齊桓欲霸諸侯至是威行信立而諸侯宗之爲盟主不待天子之命而中國之不至者寡矣古者方嶽有同盟以示其考禮修德以尊天子之意桓公至此以諸侯既授以事而霸業定因舉是禮約束諸侯尊周以掩其無王命之事與伐楚而舉召康公之命相似自此欲制諸侯而脅從之者皆稱同盟其無王命假古誼以制與國一也而善惡則各繫於其事焉穀梁稱桓公未嘗有歃血之盟而孟子於葵丘之會亦曰諸侯束牲載書而不歃血夫子所謂桓公九合諸侯不以兵車此蓋其衣裳大會之始也魯莊與盟已而背之諱不書公者蓋上無天子下無方伯非桓公出而尊周攘楚則中國之民必不免於被髮左衽之禍此同盟于幽之書所

以臯魯而與齊也楊雄以習亂爲春秋
不得已而與齊晉蓋得春秋之旨矣
邾子克卒克儀父名

稱子者蓋齊桓請王命以爲諸侯故曰子於是始列於
諸侯也○臨江劉氏曰未成國曰邾儀父既成國曰邾

子克成國而後書其卒記其葬未成則否

十有七年春齊人執鄭詹

詹公羊作瞻下同○詹鄭大夫叔詹也不氏與柔溺同執

鄭詹討鄭伯不朝齊之罪當書齊侯而稱人以非伯討

貶也諸侯不服不能修德以來之而執其大夫則小國

之從齊皆出於力不贍而非夏齊人殲于遂殲公羊作

殲○傳遂

因氏領氏工婁氏須遂氏饗齊成醉而殺之齊人殲焉
今案十三年滅遂置戍今乃見殲於亡國之遺民蓋絕

滅社稷以及其君慮其民之思舊主而以兵力強制之
不知彼心不服吾力稍怠必有出於意料之外者蓋王

者之道貴於興滅繼絕而齊之滅遂不止於殺一不辜而已故聖人於此不言遂人殲齊戍而特書其自殲所以伸遂人以死復讎之志而著桓公之不仁以至於自殲其衆也

秋鄭詹自齊逃來

列

國大夫踰歷三時不令其服臯而去致防閑弛慢國囚亡逸齊之臯也奉命以使霸國有臯不能即刑竊身逃竄同於苟免之匹夫無大夫之行失節辱國詹之臯也同幽之盟守信不篤爲逋逃主以取伐於霸主魯之臯也片言而三臯著春秋簡嚴於此可見冬多麋則爲異先儒皆以害稼而記災當從山陰陸氏之說以爲陰盛所感惡氣之應蓋記異也

十有八年春王三月日有食之

不書日朔俱失之也

夏公追戎于

濟西

泰山孫氏曰不言侵伐止言追者明不覺其來已去而追之也書者譏內無備也○胡氏傳爲國無

武備啓戎心而不知警危道也春秋之秋有盛盛名短

孤含沙

意其必未雨而徹桑土閒暇而明政刑以射水中人影中之輒病或至於死江淮以南水濱有之魯所無也○山陰陸氏曰盛陰物也麋亦陰物也是時莊公上不能防閑其母下不能正其身陽淑消而陰慝長矣此惡氣之應也○今案漢書五行志劉向董仲舒已有是說蓋麋者迷也盛者惑也是時文姜爲亂於閨門之內其遺毒餘患至於哀姜卒再成篡弑之禍物類之感天之示人顯矣冬十月

十有九年春王正月○夏四月○秋公子結媵陳人之

婦于鄆遂及齊侯宋公盟

程子曰鄆之巨室嫁女於陳人結以其庶女媵之因與齊

宋盟挈之以往結好大國所以安國息民以私事之小取怒大國故深臯之書其爲媵而往盟爲遂事○愚案

是時莊公昏懦文姜制國政事不修君命不重故結無
復君言不宿於家之禮而以私家之鄙事參會霸之大
命先私後公而無所畏興戎致討而莊公不誅國之無
政莫大於此書公子結媵陳人之婦于鄆如臧孫辰告
糴于齊以爲臧孫之私行也

夫人姜氏如莒

爲國君之母非父母

之國而出入縱恣此行比於詩之所刺謂魯道有蕩齊
子豈弟者抑又甚矣莊公旣無復防閑之意而執國政
者無人抑又可知安得不成淫風而致

冬齊人宋人陳

人伐我西鄙

三國書人將卑師少也鄙邊邑也擁衆於邊鄙問公子結輕君命不恭霸主之卑也

惟干戈省厥躬魯蓋無辭於討矣

二十年春王二月夫人姜氏如莒

文姜比年如莒春秋詳書蓋與詩之變風

相應當是之時一反闕雖麟趾之化而中國之俗於是
大亂夫一國之事繫一人之本此春秋所以詳書文姜

之行

夏齊大災

天火曰災書大志其甚也齊人來告魯
往弔之故書○臨江劉氏曰凡弔人者

哀其禍而救其乏

秋七月

○冬齊人伐我

於穀梁作我○齊桓
於是舉攘我狄之兵

戎在徐州之域最近
齊魯故先治之也

二十有一年春王正月○夏五月辛酉鄭伯突卒

突鄭
莊公

之尊子莊公既卒即奪忽之位而篡之中間雖爲祭仲
所逐旋入于櫟卒取鄭國春秋不復著忽疊儀之在位
所以著其不能君也故論者以爲突始終能君夫篡弑
竊國之人而春秋終始君之且復記其卒於位豈真與
之哉所以著小人肆志亂臣賊子得以
終於其位王法不行而世之所由亂也
秋七月戊戌夫

人姜氏薨

文姜之行惡矣而卒以國君之母寵榮終身一用小君之禮此魯之禍所以未艾必至於

莊公之終兩君弑哀姜慶父誅而後魯亂始息也

冬十有二月葬鄭厲公

二十有二年春王正月肆大眚

青公羊作省○謹案書曰青災肆赦怙終賊刑

孔氏曰青過也肆緩也原其意蓋謂過而入于刑者緩之又赦之此宥過無大之意也怙終不悛賊殺刑戮之所加刑故無小之意也周官於三刺之後乃分眚災之目有所謂不識過失遺忘幼弱老耄蠢愚可謂詳矣然後可以求民情斷民中此堯舜三代之法不可偏廢者後世兩失之偏慘刻者不復察其情舉過失而盡刑誅之及姑息之過如莊公者反取大辜極惡而例之於青災以從肆赦之例怙終得志良善瘖啞此用舜典青災肆赦之名而不察其實春秋謂之肆

癸丑葬我小君文

大眚以譏其務小惠而失大德也

姜○陳人殺其公子禦寇

公子蓋世子也不稱世子未誓於天子也未誓則稱公子

重王命也殺世子母弟稱君今反稱陳人故胡氏曰陳亂無政衆人擅殺之也衆人擅殺固不得爲無辜然禦寇乃君之嗣適爲一國之儲貳而衆人得以殺之則其所自處必有失其道者矣故臨江劉氏譏禦寇之爲人子足以殺其身而春秋略殺者之辜也夏五月下脫秋七月丙申及齊高

偃盟于防

公羊傳高偃者貴大夫也曷爲就吾微者盟公也公則曷爲不言公諱與大夫盟也此與

及向戌盟于劉其敵大夫以自卑輕君體以自弱去國都而汲汲於小信一也而此復以婚姻而結盟不顧禰廟不共戴天之仇而與齊爲昏又當冬公如齊納幣案

比事以觀而知此爲惡之大者也

昏

禮有六曰納采問名納吉納徵請期親迎春秋書納幣即納徵逆女即親迎蓋納幣乃事之成而親迎事之終

故也莊公生至是三十五年矣制於文姜過期而不娶
今喪未畢而納幣圖婚又忘父仇禮不當親行而躬致
其禮其爲不孝之臯
不待貶絕而具見矣

二十有三年春公至自齊

告于廟也春秋書至蓋原於
書巡狩而歸格于藝祖用特

之意聖人以舉動之公往返之節質之幽明而無愧也
今莊公忘父讎而娶其女冒母喪而往納幣以此告廟
以爲有人心者宜於此焉變矣此與他日書祭叔來聘
至不可同日語也比事屬詞示人之意顯矣祭叔來聘
祭叔祭公之臣爲祭公而聘魯不言使穀梁氏曰不正
其外交故不與使也○胡氏傳祭伯來朝而不言朝祭
叔來聘而不言使尹氏王子虎劉卷來計而不書其爵
秩皆所以正人臣之義也人君而明此不容下比之臣
人臣而明此不爲交私
之計黨錮之禍息矣

夏公如齊觀社

社者古人祀地
之名古制惟爲

社事單出里惟爲社田國人畢作東遷而後王制漸變
祀事不存古意浸爲美觀襄公二十四年齊社蒐軍實
使客觀之其廢祀典而夸愚俗兆於今矣故左氏外傳
載曹劌之言曰齊弃大公之法觀民於社君爲是舉而
往觀之非故業也天子祀上帝諸侯會之受命焉諸侯
祀先公卿大夫佐之受事焉不聞諸侯之相會祀也君
舉必書書而不法後嗣何觀程子曰昏議尚疑故以觀
社再往請議後一年方逆蓋齊難之觀此亦足以見齊
桓欲親魯以圖霸而

公至自齊○荆人來聘

楚自四五
年來先加

親之不以其道也

兵於蔡鄭而以聘使至魯已用遠交近攻之術聖人於
此書其來聘而不書使必其禮有未備者中庸曰送往
迎來嘉善而矜不能此三代柔遠人之道也至於此時
以魯而受楚之聘非有德以懷來之彼之以禮幣至亦
當審所以待之之術如班彪述漢宣戒邊吏之言以爲
匈奴大國多變詐待遇得其情則却敵折衝應對入其

數則反爲輕欺觀春秋止書荆人公及齊侯遇于穀爲

來聘亦可見所以待遇之品節矣姻而齊難之也不可與爲婚姻則當絕之而數與之約

然後與之書此所以著莊公之不子而齊桓待人之不以義蕭叔朝公蕭令徐州蕭縣諸侯相見曰朝書朝公

秋丹桓宮楹穀梁傳禮天子諸侯黜堊大夫蒼士黻丹楹非禮也冬十有一月曹

伯射姑卒○十有二月甲寅公會齊侯盟于扈扈鄭地至此又

盟以結其信而後許之也

二十有四年春王三月刻桓宮桷桷椽也穀梁傳天子之桷斲之礲之加密

石焉諸侯之桷斲之礲之大夫斲之士斲本刻桷非正也刻鏤也於礲斲之外又加刻鏤之工也又曰夫人所

以崇宗廟也取非禮與非正而加之宗廟以飾夫人葬
非正也刻桓宮桷丹桓宮楹斥言桓宮以惡莊也

曹莊公○夏公如齊逆女

諸侯無越竟逆女之禮於紀履綸逆女之書辨之詳矣然

則莊公無父之仇猶不可以親至齊廷也況躬君弑於齊而舍宗廟之守往受其女於廟乎昔晉王裒讀蓼莪之詩而哀痛終其身莊公思妃偶之合兩年之間三至齊廷而念不及於其父春秋所以詳書而誅其心也與

秋公至自齊

公羊穀梁與孫氏言之詳矣杜預究公羊之指歸以爲爲孟任故足以見莊公不夫

哀姜妬忌之情矣經以傳爲案此類是也

八月丁丑夫人姜氏入

謹詳此書夫人之至

特異於桓公及文公以後夫人至之例而以入書之○穀梁氏曰入者內弗受也娶仇人子女以薦舍於前其

義不可受也○愚案妻者齊也一與之齊終身不改故書夫人姜氏入而莊公無人之心於奉祀祭享之際

終其身爲可見矣始之不正終必致亂故夫人不終嗣
子不立魯國幾亡皆哀姜入之所致書八月丁丑見後
公而至之日多也在易歸妹征凶
無攸利莊公之娶哀姜當之矣
戊寅大夫宗婦覲用

幣

夫人至大夫見於宗廟婦見於內禮也男贄大者玉
帛小者禽鳥女贄不過榛栗棗脩今大夫宗婦並覲

同贄特書以譏其失男女之別○胡氏曰公曰見私曰
覲夫人不可見乎宗廟則不可以臨諸臣故以私言之

也大水

夫人姜氏入而大水應之天人冬戎侵曹將以
感應之速如此春秋所以書也

也曹文之昭也戎挾不正以納
之齊桓不能治所以累齊也

曹羈出奔陳赤歸于曹

羈繫於曹與齊小白鄭忽同明其正也杜氏陸氏以羈
爲曹之世子即位踰年而不稱爵不能君也赤不繫國
不書公子蓋庶孽也書歸言易戎力足以主之國人聽
命是以不難也赤以庶逐嫡戎以裔謀夏而天子方伯

不能正又著羈之不能自立乎其郭公蓋經闕誤也劉氏傳或曰是郭氏
位比事屬辭簡明之旨可以觀矣
亡也齊桓公之郭問父老曰郭何故亡曰以其善善而
惡惡也公曰若子之言乃賢君也何至於亡父老曰郭
君善善不能用惡惡不能去所以
以亡也考其時與事理或然也

二十有五年春陳侯使女叔來聘

女氏叔字不名天子之命大夫也陳始來

結夏五月癸丑衛侯朔卒

惠公也在位三十一
年魯不會故不書葬

六月辛

未朔日有食之鼓用牲于社

日食陰盛陽微之徵事關
天下固不止爲一魯而諸

侯亦有臣民則因天變以自省如洪範五事敬謹於視
聽言動思之間一失其正則咎必應之古人應天以實
而不以文故高宗彤日洪範之言乃古人之所先務至
如肩征與周禮鼓人大僕所載乃禮文之末耳一時遭

變禮文固不可廢然正其本而後末可理也今莊公於
充陽之本蓋藐然矣鼓何益乎又用牲而欲以物求免
書此以見其本末之皆失也

伯姬歸于杞

伯姬莊公女不書逆不使卿志失禮也

秋大

水鼓用牲于社于門

傳曰非常也凡天災有幣無牲非日月之眚不鼓○愚案比年大水

陰盛陽微之變極矣莊公若思先王正厥事之意謹內
外之防嚴夫婦之別使陰沴無寢長之漸則後日之禍
猶可及止也鼓以充陽之事與後世減膳避寢之禮皆
既具文而未必有正厥事之誠意實政也既文而無實
尚非修德應天之道況徒以牲牲飲食求免乎書日食
大水用牲等事以見莊公非惟不恐懼修省以正其本
而禮文之末亦錯矣

冬公子友如陳

友莊公之母弟報女叔之聘也

二十有六年春公伐戎

公羊無春字○今年伐戎爲追于濟西之恥報怨也以莊公治

家與國之多缺而勞師於戎雖能復怨何益於魯夏公之內治乎書此以見忽蕭牆而修怨爲不知務也

至自伐戎

勞師事外踰時而反危之也

曹殺其大夫

曹伯赤殺之也稱大夫則不失

其官豈於羈赤出入之際或不附戎而殺之若鄭屬之殺原繁傳瑕與君之卿佐是謂股肱加之鉞鉞是自虧其股肱也四凶之臯大矣而舜所殛死惟鯀而已其三人者曰竄流放尚從末減也諸侯雖得專一國之權而卿大夫非大臯極惡不得擅加以刀鋸必以聞於天子此王制之所甚謹雖霸者之申禁猶不敢廢蓋視爲一體則恩意之篤自足以感其忠敬之心於無窮而視猶土芥無臯而殺之則寇讎之視有所必至此春秋於殺大夫所以詳書以謹之而上下相殺之變至於定哀而極也○胡氏曰稱國以殺者君與大臣擅殺之也義繫於殺則止書其官義繫於人則書其名氏也

秋會宋人齊人伐徐

公穀作公會左氏古

本無公字陸氏纂例同案宋齊皆早者則內亦當然左氏爲止○徐嬴姓國近齊魯今泗州臨淮縣是也徐蓋是時已服楚故齊率諸侯伐之宋序齊上蓋齊桓使之主兵然失霸體矣故劉氏非之

冬十有二

月癸亥朔日有食之

二十有七年春公會杞伯姬于洮

薛氏曰洮溝在濟州今濟南府是也○傳

曰非事也諸侯非民事不舉會伯姬非禮也○陸氏曰參譏之公及杞侯伯姬皆失正也

夏六月公

會齊侯宋公陳侯鄭伯同盟于幽

再舉同盟之禮以申霸令而一諸侯之心

也魯宋陳鄭偕至而衛獨不來故明年伐衛

秋公子友如陳葬原仲

原仲陳大夫原

氏仲字也禮臣既沒不名故稱字公子友如陳葬原仲無以異於葬諸侯之使則友之行莊公使之非私行也

故劉氏曰何以書譏何譏爾君不行使乎大夫君行使乎大夫內失正也大夫不交諸侯大夫而交乎諸侯原氏失正也內失正原氏失正季子冬杞伯姬來歸寧也可以已矣則是從命也參譏之

洮今又歸寧志其來往之數非歲一歸寧之義所以厚男女之別也

莒慶來逆叔姬

慶莒大夫

也叔姬莊公女卿自爲逆則稱字嫁女於大夫尊卑不敵當使大特書莒慶之逆者諸侯嫁女於大夫尊卑不敵當使大

夫主以與之今公自主之非禮而杞伯來朝杞爲三恪桓公之篇

任情春秋之所謹故特書以譏之

以侯書今稱伯者國小力微故降爵以自儕於公會齊小國杞之自侯而伯自伯而子蓋浸以微弱也

侯于城濮

城濮衛地齊欲討衛而會魯於此定其交而後加兵於人所以見其謀之審也

二十有八年春王三月甲寅齊人伐衛衛人及齊人戰

衛人敗績

前年同盟衛人不至衛爲與國又嘗受盟于幽伐而不服羣乃以齊來伐之日即因其至

而急擊之然終不能敵齊人節制之師而敗春秋著衛之不服羣以取敗故舉戰之日加於伐之上公羊所謂至之日是也以衛爲主深羣之也齊

夏四月丁未邾子

瑣卒○秋荊伐鄭公會齊人宋人救鄭

公羊宋人下有邾人○傳楚令

尹子元以車六百乘伐鄭入于桔柣之門衆車入自純門及遠市縣門不發楚言而出子元曰鄭有人焉諸侯救鄭楚師夜遁○愚案是時楚文王卒成王幼子元因夫人之言而伐鄭師出無名故鄭人示以閒暇而不敢入聞諸侯之救而遂遁時桓公攘楚之計未定楚政雖亂然自若敖蚡冒至于武文兵制尚在是後二年之間楚殺子元授政於令尹子文復修國政故召陵之師雖舉而楚之君臣亦非此時之比所以僅能使之受盟而

已終不足以

冬築郛

郛公羊穀梁作微○郛魯下邑築者創始造邑也冬雖用民力之時

而下書大無麥禾則

大無麥禾臧孫辰告糴于齊

辰穀梁作

臣○不言水旱而言大無麥禾者天時人事至此兩不足也洪範曰五者來備各以其序庶草繁廩則大無麥禾已見德之不修而不能召和矣然古人初不敢必於天恐其或爽所應每預爲儲蓄以待之故常以三十年之通制國用節以制度使有九年之蓄恃吾之有政而不恃天也今一年不熟而上下相顧無以粒民重臣至自請往告糴於鄰國若不過齊桓則魯之民必至坐視轉死於溝壑矣故不言如齊告糴甚急不可緩之辭譏君臣政事不修遇變苟且非所以爲國也

二十有九年春新延廩

延廩馬閑也言新有故而修之也穀梁傳有故則何爲書也古

之君人者必時視民之所勤民勤於力則功築罕民勤
於財則貢賦少民勤於食則百事廢矣冬築微春新延
廢以其用民力爲已悉矣○愚案孔子以敬事而信節
用而愛人使民以時爲道千乘之國之法春秋比事而
書足以見莊公無君國子民夏鄭人侵許許與鄭世讎
之心於斯三者皆失之矣秋有蜚也○何氏云異
之後不與於齊桓之會鄭人侵之或齊之命與自後許始從中國
惡臭之蟲南粵所生非中國所有書有言本無也冬十有二月紀叔姬卒年十二
于鄆至此乃卒杜氏註紀國雖滅叔姬執節守義故繫之紀賢而錄之城諸及防魯邑諸
今密州諸城縣縣又有故防城言及者別二邑也

三十年春王正月○夏師次于成

左氏無師字任公輔曰人微師少不見於

經知當從公穀書師成魯地地譜今泰山鉅平縣東南
○案趙氏曰魯蓋欲會齊圍鄆至成待命聞鄆已降不
復行耳以前會城濮明年
來獻捷考之理必然也

秋七月齊人降鄆

公羊曰鄆紀之遺邑

也杜氏註東平無鹽縣東北有鄆城即今東平府須城
縣趙氏曰降服而爲附庸也○常山劉氏曰齊肆其強
力脅而服之也不書鄆降而曰齊人降鄆以
齊之強故卑之深以鄆之弱故責之薄也

八月癸亥

葬紀叔姬

紀叔姬從一而終不以存亡貳其心故詳錄
其生死又紀魯之往葬皆以正夫人之理書

之所以明婦行以
示後世之法也

九月庚午朔日有食之鼓用牲于社

鼓禮也用
牲非禮也

冬公及齊侯遇于魯濟

杜氏註濟水厯齊魯
界在齊爲齊濟在魯

爲魯濟蓋魯地○謀伐山戎以其病燕故簡齊人伐山
禮以議軍旅之事所謂定其交而後求者與

戎

公羊傳齊人伐山戎此齊侯也其稱人何貶曷爲貶子司馬子曰蓋以操之爲已蹙矣○孔子曰遠人不

服則修文德以來之今中國之聲教未洽近有荆楚爲中國患尚未正臯而勤兵于遠爲燕闕地其治之先後

兵之次第皆失之矣故人齊侯以爲舍近事遠勞中國以事夷狄之戒示強本治內柔服遠人之道也

三十有一年春築臺于郎

何氏註禮天子有靈臺以候地諸侯有時臺以候四時

登高遠望人情所樂動而無益於民者雖樂不爲也四方而高曰臺○劉氏傳何以書譏何譏爾譏厲民也去

國而築臺是樂而已矣

夏四月薛伯卒

薛始稱伯蓋降班而告終也

築臺于薛

杜氏註薛魯地

六月齊侯來獻戎捷

傳非禮也凡諸侯有四夷之功則獻于王王以警于

夷中國則否諸侯不相遺俘○常山劉氏曰齊伐山戎得其捷齊侯躬來夸示以威我而聖人書曰來獻者抑

之也○愚案獻者下奉上之辭觀筆削之旨則齊桓之恃功而不知禮魯不當納而輕受之其臯皆可見矣

秋築臺于秦

杜氏註東平范縣西北有秦亭案寰宇記范縣今屬濮州亭尚存○穀梁氏曰不正

罷民三時虞山林藪澤之利且財盡則怨力盡則懟君子危之故謹而志之也○愚案莊公一歲築三臺政所謂及是時般樂怠教者則治國治家之當務荒廢多矣此所以踰年身死而蕭牆之禍至奕世而不能定也可不鑒

冬不雨

一歲三築臺明年春城小穀故冬書不雨則莊公無閔雨之志可知然獨酉戌亥之

月不雨故不得歷時而言也

三十有二年春城小穀

小穀魯地泰山孫氏曰曲阜西北有小穀城胡氏曰孫魯人也

而終身學春秋其考此事詳矣○永嘉薛氏曰莊公自六年之後大無麥禾無麥苗螟麋蠶蜚相繼而有大水

者三中君之性尚當少警而公之侈心日起因娶而觀社丹楹刻桷告糴之後有築郿之役次年新廩城諸防去年三築臺而不雨今春又城小穀平

夏宋公齊侯遇

于梁丘

梁丘在濟州昌邑縣○齊侯爲楚伐鄭之故請會于諸侯宋公請先見于齊侯故遇于梁丘書

先宋公齊不以霸主自居以梁丘近宋而先之也

秋七月癸巳公子牙卒

杜氏註牙

慶父同母弟謚僖叔○傳初公築臺臨黨氏見孟任從之閔而以夫人言許之割臂盟公生子般焉公疾問後於叔牙對曰慶父材問於季友對曰臣以死奉般公曰鄉者牙曰慶父材成季使以君命命僖叔待于鍼巫氏使鍼季酖之曰飲此則有後於魯國飲之歸及達泉而卒立叔孫氏○公羊傳曷爲不言刺之爲季子諱殺也季子之過惡也不以爲國獄緣季子之心而爲之諱也季子之過惡柰何莊公病召季子曰牙謂我曰魯一生

一及君已知之矣慶父也存季子曰夫何敢是將爲亂乎夫何敢俄而牙弑械成季子和藥而飲之公子牙今將爾辭曷爲與親弑者同君親無將而誅焉然則善之與曰然何善爾誅不得辟兄君臣之義也然則曷爲不直誅而酖之行誅乎兄隱而逃之使託若以疾死然親親之道也○愚案古者公族有死皐則磬于甸師氏刑于隱者不與國人慮兄弟也叔牙黨慶父而萌篡弑之心故季子正其皐以君命討而誅之又以親親之義不彰其惡唐陸氏所謂思義俱立權而得中也或謂季友雖殺叔牙而無補於後日子般閔公之禍是蓋不然自文姜以來胎養亂本至此已成若於此時不誅叔牙則莊公之薨濟以叔牙雖有季子之忠秉禮之俗亦無所措其手矣故叔牙之誅乃魯國存亡之幾慶父成敗之決春秋取其遏惡救亂能先事而誅之所以原其心而爲之

八月癸亥公薨于路寢

書月書日謹之又書其所詳凶變且以別正不

正也路寢正寢也○穀梁氏曰寢疾居正
寢正也男子不絕於婦人之手以齊終也
冬十月己未

子般卒

○己未公羊穀梁作乙未○子般莊公子見上註

存稱世子君薨稱子某既葬稱子踰年稱公子般卒何以不書葬未踰年之君也有子則廟廟則書葬無子不廟不廟則不書葬○傳初雩講于梁氏女公子觀之圍人聲自牆外與之戲子般怒使鞭之公曰不如殺之是不可鞭聲有力焉能投蓋于稷門公薨子般即位次于黨氏十月己未共仲使圍人聲賊子般於黨氏成季奔陳立閔公○愚案此子般見弑而書卒者諱之也莊公主魯之社稷而君道不立上不能正其母使出入淫縱配耦不早立是致冢嗣之位不足以自定內失閑家之道而使國人聲得以戲女公子觀其告子般之言非不知聲之可誅而又欲以誅殺之權委其子亦終於不能殺而貽身後之患易曰閑有家悔亡傳曰欲治其國者

先齊其家莊公反此使淫亂肆行雖其身免篡弑之禍而及其二子春秋自夫人孫齊以來三十年間備載莊公內治之失而終之以此所以臯公子慶父如齊慶父其無風教之本而不免於首惡也自莊

公即位以來已專兵柄而莊公之昏庸耽樂不卹國事致慶父肆行姦宄陰爲它日取國之計觀莊公疾時與叔牙問荅之辭使非季子應時誅之則般不復得立矣今雖弑子般而尚未能取國非特季子之黨未順亦見魯俗秉禮人心未盡從也故因閔公之立告於霸主以爲自託之計齊桓以方伯自任與魯爲鄰且親豈不知慶父爲弑君之賊容其來使使之復歸以遺魯國之後禍即此已見其無討賊之實意而有取魯之私心春秋書慶父如齊著莊公不君養成其惡使得狄伐邢杜氏以出入自如而齊侯失方伯連帥之職也狄伐邢杜氏姬姓周公之肖國在廣平襄國縣今之邢州龍岡縣狄北狄前此雖未見於經然自伐邢而滅衛三年之間塗

炭兩國首以伐
書著其強也

閔公

名啓方莊公之子母叔姜史記
云名開謚法在國遭難曰閔

元年春王正月

胡氏曰不書即位內無所承上不稟命
也○今案閔公以幼爲慶父所立初不

知子般不終之故此齊桓公之責也桓公若能請於天
子誅哀姜慶父於此時而爲之置君則父子君臣之倫
定而大義明矣乃縱慶父歸其國以致閔公爲
篡弑者所立故不書即位亦所以累齊桓也

齊人救

邢案傳管仲言於桓公以爲戎狄不可縱諸夏不可弃
燕安不可懷引詩云豈不懷歸畏此簡書請救邢以

從之桓公於是興救邢之師故於此書齊人救邢以與
之而論語以免民左衽之功歸於管仲蓋救諸夏攘戎

狄皆管仲
發其端也

夏六月辛酉葬我君莊公

國亂子弑嗣君幼
弱十一月乃葬所

謂危不得葬也

秋八月公及齊侯盟于落姑

落公穀作洛落姑齊地○請復季友

也是時閉公幼弱哀姜慶父爲亂國人思得季子以靖難而大臣尚能奉閔公會霸主以請季子卒致季友之

歸此秉禮舊俗未泯之驗也

季子來歸

邦之杞隍有親且賢孰不賴之季友遏惡於初萌子般之

亂力不能討而遂去之非其臯也故魯人思之齊侯從閔公之請使召諸陳季子始歸春秋從諸侯兄弟之例特字之而書來歸所以著季子足以爲冬齊仲孫來

傳言

齊仲孫湫來省難實所謂覘國也仲孫齊智謀之士故歸告齊侯言不去慶父魯難未已公問魯可取乎對曰

不可猶秉周禮周禮所以本也臣聞之國將亡本必先顛而後枝葉從之魯不弃周禮未可動也君其務寧魯難而親之○臨江劉氏曰桓公不務修霸主之義討有臯扶微國而更使智計之士窺覘虛實致慶父極惡魯

君再弑此由桓公仲孫謀不臧之弊也故奪其君臣之
常辭以見君使臣不以禮臣事君不以忠法之所禁也
孔子沐浴而朝請討陳恒豈嘗告其君以齊人尚強待
其自斃哉○愚嘗論之仲孫之臯固如劉氏之言矣然
其言魯秉周禮國有本而不可動則於此可以見周公
之澤入人深而足以維持其國於政亂俗壞之日所謂
秉者與民之秉彛秉文之德同著明於心而不可奪之
謂也當是時周公之禮存於人心爲亂者獨哀姜公子
慶父數人耳而在朝之人有見於周公之典禮而不從
弑父與君者尚多有之所以國再有難而誅慶父立僖
公尚得以自存於極亂之時仲孫之智善於覘國而不
能輔君速行方伯之義此春秋所以雖貶而尚不名以
爲猶有以異於傾險
乘釁者之可誅也

二年春王正月齊人遷陽

陽國漢志東海郡陽都縣是
啖助曰移其國於國中而爲

附庸蓋桓公之強力施於可取者如此非有興滅繼絕之誠心也

夏五月乙酉吉禘于

莊公

禘爲天子宗廟之大祭不王不禘諸侯不得用之魯有禘樂其非禮與雖先王所賜而止可用於周

公之廟不可施於羣公趙氏程氏言之詳矣況喪禮二十五月而祥又兩月而禫然後以吉祭易喪祭今莊公之薨至此纔二十二月喪未三年主未遭祔嗣君幼弱而以吉禮盛樂用於神主忘哀懼上反易人心何秉禮之有此蓋出於哀姜慶父樂哀謀篡而爲之又非他日僭禮之所得比矣婉而成章尤當比事以考聖人誅絕之旨

秋八月辛丑公薨

傳公傳奪卜薨田公弗禁共仲使卜薨賊公于武闚成季以僖

公適邾弑而書薨諱之也不地隱之不忍言也例于羣公之書地者而此不書則隱諱變故之實亦可見矣他國之篡弑明書之可也凡人於其父祖之辜惡尚不忍肆言之聖人書父母國之惡豈可同於他國而不隱乎

然諱國惡者臣子之禮也存事實者傳信之法也聖人之經兩存禮法以垂訓萬世故不徒隱諱而已而不書地以變於常又比事屬辭以見其實將使後人因例啓疑考究始末以知莊公不能正身齊家致後嗣再弑國幾滅亡雖欲諱之而其實終不可得而揜究觀書法則知左氏所謂微而顯志而晦婉而成章盡而不汙懲惡而勸善非聖人孰能修之者蓋指此類而言之

九月夫

人姜氏孫于邾

傳言哀姜欲立共仲而與聞閔公之弑經書其奔與文姜不同者文姜妻也哀

姜母也妻義尤重故哀姜於喪歸貶姓而已

公子慶父出奔莒

傳成季以僖公適邾共仲

奔莒乃入立之以賂求共仲于莒莒人歸之使公子魚請不許哭而往共仲曰奚斯之聲也乃縊○慶父與哀姜謀弑閔公欲自立而不遂此魯國秉禮之驗也方季友適邾之時使魯國無人安能逐姜氏慶父哉季友既

立僖則當正慶父之辜致辟於甸人以致兩弑其君之討乃以賂求于莒不許其入而已又立孟氏與叔牙同無復輕重之別豈非邦憲之失此所冬齊高子來盟公

羊

傳高子不名喜之也何喜爾正我也魯比三君死曠年無君桓公使高子將南陽之甲立僖公而城魯或曰自鹿門至爭門是也或曰自爭門至吏門是也魯人至今以爲美談曰猶望高子也○常山劉氏曰不稱使者齊侯使高子來視魯而未定盟高子至而後結盟也○愚案此所謂寧魯難而親之者然春秋予高子之能恤魯奉使而知權十有二月狄入衛衛之滅非特懿公好鶴是以字之

衛

而失人心蓋自惠公即位宣姜淫恣耽樂忘政習實爲常公又重之亡形已具故狄人一至而渙然離散國隨以亡非齊桓公救而封之則康叔之後至此無噍類矣桓公迎其遺民立文公而爲之建國家社稷此所以止書入也以衛爲春秋初

哉鄭弃其師

昔舜授禹之辭曰后非衆罔與守邦此古先聖人相傳之旨也宗廟社稷主之於君

之大國方與齊侯胥命欲爲方伯才四十年而淪於亡滅所以治國必先齊家而淫亂之禍不篡則滅可不戒守之以人君與一國之人蓋一體也今以欲遠所惡之人而舉一國之衆付之度外存亡死生舉不以關其心當時如楚如狄方有狡焉思啓封疆之心一旦乘罅擣虛則鄭必束手就亡矣春秋書法因物賦形或書人臣之奔或書師旅之潰此皆不以是書而蔽臯乃如此可以識輕重之權衡矣以此類推之後世謀國如舉一郡縣之民三軍之旅陷於重圍之中置而不救皆得臯於聖人者○胡氏曰惡高克者文公而特書鄭者蓋國本顛危曾不扶持是大臣之失職也

春秋卷三